



廣東通志

ル 5
1508
12



門ル呂6
第 1508
巻 12

特

門ル 5
第 1508
巻 12

廣東通志卷之二十四

郡縣志十一

廣州府

人物二

國朝何真字邦佐東莞人少英偉有才畧事母以孝稱元至正中仕為河源務副使時中原兵起嶺海騷動棄官歸慨然以生民為念至正十五年邑民王成陳仲玉構難直請于行省舉義兵執仲玉以歸成築砦自守乃使其弟迪驍將黃從簡等頓兵圍之募人

能縛成者鈔十千未幾成奴縛之以出真釋之引坐
笑謂曰公奈何養虎遺患成慙謝曰始以爲猫孰知
其虎奴求賞真如數與之使人具湯鑊烹奴駕轉輪
車數人推之令奴妻嘔火號於衆曰四境有如奴縛
主者視此於是人服其賞罰有章居無何叛將黃常
與王仲剛據惠貪虐不道民苦之迎真守惠遂常戮
仲剛解惠州之困遂兼領惠循二州行省上其功累
遷惠州路同知癸卯南海民劾宗愚陷廣州守將何
深死之真率將校復其城號令明肅廣人大悅擢廣

東分省參知政事進江西行中書省左丞弟迪以徵
征功擢宣慰使未幾改江西福建行中書省左丞仍
治廣州乙巳九月宗愚挾廉訪副使廣寧等叛圍廣
真禦之踰十月部將與賊通絕糧道真出避城陷丁
未五月真率惠州部曲至廣民響應復克之宗愚退
走真保有廣南或陳符瑞勸爲尉佗計者即戮之示
無二心洪武元年二月 高皇帝命征南將軍廖永
忠率舟師取廣東至福州即遣人諭真宣示威德使
降遂航海趨廣東三月壬辰師至潮州真遣都事劉

克佐詣軍門上印章已亥復籍部內戶口兵馬錢糧
遣使奉表降永忠迭其使及表詣京師 高皇帝賜
詔褒之驛召至京四月永忠至東莞直率屬出見永
忠慰諭之仍榜招降諸寨邵宗愚等餘孽悉平詔至
真乘傳入朝貢方物賜宴中書授江西行省叅知政
事直涖官政令風行霆斷人莫敢犯而尤主寬厚好
儒術平居讀書綴文無虛日三年遷山東行省叅政
四年命還廣東收集舊將士復任山東九年致仕十
三年真請以子貴叅侍東宮即除貴比城兵馬指揮

十四年命真及貴同往雲南規畫糧餉開拓道路置
驛傳以候大軍征討及還擢山西右布政使十六年
致仕復命真及貴往山東收集土豪一萬六百有奇
還朝拜貴鎮南衛指揮僉事十七年復命真歸廣東
收集未至軍校十八年遷浙江十九年朝京師調湖
廣二十年復賜致仕八月封東莞伯食祿一千五百
石予鐵券復賜鈔萬貫甲第一區以其第六子宏爲
尚寶司丞二十一年三月真卒年六十七 上爲文
祭之勅遷京城南真豐偉美鬚髯吐音如鍾性忠慎

歸朝畏威惟謹 高皇帝推心委任弗疑故能以功名終東莞建祠置田祀群祖以惠州私第爲義祠斥私田百餘頃爲義田世俾宗子主祀事立塾以淑其子弟置庫以周窮乏嫁娶喪葬一如范文正公故事一時名公宋濂詹同方孝孺輩皆重其爲人樂從之游至論其保障南服識時知命又南粵千百年來所未有也子八人知名者榮貴宏榮字耀先卓犖喜讀書有文名洪武二十一年夏四月襲封東莞伯後二年罹黨禍人皆傷之

區禹民南海龍津人曾祖仕衡宋景定中爲太學生嘗上書論賈似道誤國不報後陳恢復策亦不見用禹民少以剛直聞元末豪民聚爲亂禹民偕族子忠吉體原率衆立寨保障鄉土廖永忠既下廣州禹民等詣永忠降會副將軍朱亮祖困于山南賊忠等先導破之亮祖圍解事平禹民等入朝詔授禹民知汀州府以資高辭改授仁風鎮巡檢吉彰德衛百戶告身以區爲歐遂因之

張度字景儀增城人洪武壬子舉于鄉辛亥會詔選

廣通志卷之二十四
賢能補憲職擢監察御史譽望震一時彈劾持大體
高帝重之時諸勛臣連姻 帝室多怙勢不法度上
疏奏劾不避權貴風采凜然尋擢常州知府勤政持
公人不敢以私干治行爲京畿第一拜吏部侍郎條
舉銓法之不當者數十事皆見用進本部尚書藻鑑
流品確不徇私銓選得體后以詿誤受譴杜門憤惋
卒上聞之驚悼使人視篋中不盈數金命以大臣禮
葬之

簡祖英字世英東莞人學問該博兼有才畧事元爲

江西都省員外後從左丞何真起兵保護鄉邑平邵
宗愚其贊畫爲多廖永忠克服廣東乃徵祖英赴闕
錫燕勞之賚以纁帛拜建平縣知縣以母辭歸許之
時 上方以道德風厲天下凡元降臣始雖榮遇終
必擯辱名士如危素輩皆所不免蓋亦漢祖戮丁公
之意云祖英之見卓矣

趙晦字俊明東莞人系出濮邱元季避地石岡雖在
亂離中篤志問學手不釋卷洪武五年壬子以明經
薦授番禺教諭時干戈甫戢士鮮知學晦端模範嚴

課程日爲講授以身率之士類丕變藩憲大僚以其學行純懿咸禮重之擢國子監學錄多所陶範一時門徒居侍從有聲者甚衆

孫普字仲衍南海人性警敏於書無不閱覽所爲詩文援筆而就雄渾深致有魏晉風元季避亂時東莞何真保有南海普往從之洪武改元遣將軍廖永忠南征普爲真作書歸附曲盡誠款永忠不戮一人而南海晏然普之力也永忠尋徵普典郡教三年庚戌詔天下設科取士普舉于鄉授工部織染使調虹縣

主簿時經兵燹室十空九安集勞來民還其業甫一載入爲翰林典籍學士宋濂樂韶鳳承旨詹同甚重之日侍上奏對便給容觀飄灑濂輩自以爲莫及也八年同脩洪武正韻九年以奉常之節監祀西川既三載力求外補爲平原簿無何逮繫輸左校築墻望都門謳吟爲粵聲督者以聞召至陳詩皆忠愛語釋之十一年罷歸田里十五年召拜蘇州府經歷二十二年謫戍遼東都帥梅思祖節鎮三韓素重普迎居家塾未幾坐黨禍或令以疏自明不荅長歌就刑

天下寬之門人黎貞時亦在戍收葬于安山之陽黃
多著述既沒諸書散佚唯貞所編詩文行于世番禺
趙純稱其究極天人性命之理實一時儒宗云

王佐字彥舉家世本河東元末占籍南海時孫黃與
佐結詩社于南園開抗風軒以延一時名士佐才思
雄渾體裁甚工黃深重之構辭敏捷王不如孫用意
沉著孫不如王會何真開署求士與黃首被禮聘真
敬二人皆使掌書記軍旅事多見咨詢時李質以德
慶豪帥據有肇慶佐與黃往說之質遂通好然質亦

好文衣冠之士多往依之其最知名者則有江右伯
顏子中茶陵劉三吾建安張智歸言於真使招之由
此士凡以一藝名者真皆館穀之洪武六年用部使
者薦拜給事中論思補闕恒稱 上意學士宋濂嘗
拜賜黃馬 上為歌命諸詞臣和之佐斯頡而就清
新富瞻如宿構者有臣騎黃馬當赤心之句 上覽
而喜以為名世之作賜鈔一錠佐性不樂樞要居官
二載即乞骸骨 上憐其誠特俞所請陞辭日賜鈔
五十千時 天威嚴重臣僚自陳者多被譴斥佐以

恭慎得歸時稱爲難其天性孝弟父沒時有廖元正者爲料理喪事殯諸南雄之九里山終身事元正如父及卒思慕終身形於著述所爲詩清逸評者比之高適岑參

黃哲字庸之番禺人世爲著姓弱冠而孤刻苦讀書通五經嘗讀文選沉玩究竟遂能作詩造晉唐奧域性好山水結廬蒲澗栖息其中往來羅浮峽山南華諸名勝自以所爲未足乃辭家度庾嶺過吳楚游燕齊間一時湖海英豪皆與納交當風雪時泊舟秦淮過

朱文昭涂穎輩握手吟咏沽酒大噱二人喟曰君才如白雪吾雖知音如寡和何自是名益藉甚龍鳳中太祖駐師金陵招徠名儒丞相李善長叅政張昉汪廣洋交薦之乙巳拜翰林待制入禁閣侍太子讀書輔導盡志太子愛重之鈔幣之賜無虛日丙午六月左丞相徐達北伐擒元右丞相忻都應制賦詩稱旨未幾歲旱上祈雨鍾山獲應御製七言詩志喜命哲賡之甚見褒重洪武初奉使青徐諭諸反側尋出知山東東阿縣剖决如流案牘無滯且不事苛察一

縣帖服值旱麥苗盡凋乃齋戒徒跣烈日中詣洪範池龍祠禱焉其澍應祈民驩呼曰此黃公雨也浪溪有怪物作幻竊人啗之哲為文禱于天須臾風雷大作一青蛟斃水上人稱其誠感時經毛貴亂后民多流徙他鄉聞哲善政復其業者亡慮數千人戶口日滋辛亥四月遷東平府通判東阿士民遮道涕泣攀留是歲黃河決梁山申書省發民疏浚哲董東平之役經畫有方民不告勞有司欲復堰黃陵岡哲建議謂此乃胡元覆轍可求戒不可為法事遂寢尋上疏

陳時務數十事皆人所難言 上怒其狂會山東分省奏哲捐俸脩先聖祠築積水湖堤有成績 上乃釋不問哲亦乞歸得允既南還有司請哲領郡校事橫經授徒四方至者多名士歲凡數百人乙卯四月復徵還判東平後以事誥誤竟寘于法郡邑人士爭賻之且家為奠祭哲始北上時倚蓬聽雪常自詫曰天下奇音妙韻出自然者莫是過也歸構一軒名聽雪蓬學者稱為雪蓬先生

李德字仲脩番禺人夙負逸才博極群書洪武庚戌

以明尚書薦至京師授洛陽縣典史繼遷南陽西安二郡幕政暇遍覽帝王遺墟登高作賦發其胸中磊落之氣人爭傳誦常著論謂西安南陽皆天下大形勝所在建不拔之基者當擇而都之江東非其匹也士林聽其識歷職郡邑十餘年年且暮乃自陳不能吏願就教職得爲湖廣漢陽教諭當兵革初靜覺舍翳蓬翟中生徒僅十數輩皆獷野德盡心訓迪之秩滿改任廣西義寧縣學其俗尤陋德立法孜孜勸諭使約束鄉黨不得爲惡習俗日美科貢漸盛當道交

薦之而德以倦游南歸卒于家德爲詩多效長吉太白孫贊嘗笑之曰子真混元皇帝遠孫也德乃力追古作評者以爲跨晉唐云少嘗自號采真子著論如子書晚更潛心伊洛嘗謂誠意爲古聖哲心要故其詩有曰意誠諸妄遣可以通天地又曰鑿空非自然立異豈真實堯舜與塗人其初本同一故世稱理學者必曰李仲脩子孚亦能詩

趙介字伯貞番禺人博通六籍佛老諸書悉究其奧氣宇豪邁與物無芥帶興至即揮毫賦詩人莫測其

涯也。景元臨江治中與母連喪介孤憤閉戶讀書無復仕進意植二松于所居扁其軒曰臨清以淵明自擬蓋昭其志云南海文士李韓以薦起介力止之不可臨別介泣謂曰堯天雖長劉日實短子獨何心韓竟去後倅南康被累乃歎曰趙伯貞真高士也介行常以囊自隨遇景即投詩其中絕不爲人留題獨與劉樂善輩相倡和日往還西樵泉石間有司屢薦皆辭免洪武己巳以累逮赴京道南昌卒于舟中介顏如渥丹丰度類神仙中人子潔絢繹純皆善詩文

工篆隸時稱四懷絢居有父風所謂趙懷絜者後純貴贈介爲監察御史有臨清集行于世方孫蕢王佑結詩社南園一時名士如李德黃哲暨別駕黃楚金徵士蔡養晦黃希文架閣蒲子文進士黃原善趙安中安中之弟通判澄徵士訥更唱迭和文士宗之而介自成一言與蕢佐德哲並稱五先生云

彭通字萬里南海人蚤失怙恃力學工詩隱居教授從之遊者常數百人洪武四年由儒士舉銓部以名入見上親閱之拜給事中叅劾封駁正直莊嚴同

列皆以爲莫及時 上方向文學俾侍左右應制通
詩思敏給 上稱之嘗賜宋濂以醉學士歌通預廢
和列九年與方徵等十六人偕轉監察御史嘗奉
命巡京郡薦拔賢才攻擊貪暴有能聲義之擢山西
布政司叅政單車赴任能以公廉滌積弊河東運司
官匿羨餘不以實聞濂得其情遂寘于法 朝廷賜
寶鏹旌之有吳印者官至陝西方面本五臺寺僧也
以材辨受 上知嘗譖殺按察司僉事張丁其家人
橫肆諸藩臬事之唯謹偶以事于通通直其罪且斥
辱之條其事以聞 上不之罪也尋引年致仕卒于
家通爲人恭謹外柔而中實剛直爲政若不事皦察
而所舉刺動無遺失故能以功名終云

張迪增城人有才識洪武辛亥鄉薦選爲御史抗疏
彈奸有直聲忤俗左遷弋陽知縣有惠澤及民而以
嚴法馭吏後以誑誤被逮縣民何溥等千餘人赴京
奏宥還職尋復召爲御史

麥志德字純仁連山人少勤學有材幹洪武初以孝
弟力田舉尋以謀畧見奇拜五府斷事累遷右叅軍

洪武十七年擢工部侍郎試本部尚書明年爲戶部侍郎郭桓挂累懼于法或勸其自明志德歸之命竟不從

黎光字仲輝東莞人博學能文倜儻有奇氣洪武壬子鄉薦釋褐拜監察御史正色立朝卓有風裁常按蘇松民罹災饑疏請賑之存活甚衆及巡鳳陽所條奏皆切時弊遂受知于上性剛介執法不阿爲御史大夫陳寧所忌擢刑部侍郎三閱月竟中以事謫同知卒人皆惜之光父伯原元季歷德慶惠陽教授所至學者尊之有漁唱稿傳於時光學行才識賈異於人盖得家學云

廖德彰增城人元末爲本邑教諭當嶺海繹騷建策保障民賴以安至聖朝統一寰宇始退居于青帽山以耕讀爲業洪武辛酉隣民蘇友興惑衆作亂德彰募義兵佐南雄侯趙庸討之寇平復歸隱

茹連新會人明經學領洪武丙子鄉貢初爲齊府奉祠副改江安丞超爲刑部員外郎出知長沙府連身長大帶圍六尺一飯數升豕首一枚然皆仰給於公

廩之入未嘗取於民嚴介自持不受私托有與連同鄉者爲令客京邸連訪之令置酒在坐相談譎夸其器用之美連艷然怒曰君非盜於民何以得此拂衣起袖金而去且云吾將聞於上衆恐怖失色莫知所爲一日入對上憫其老令致仕連不肯去連曰臣日食米肉若干臣去官無以自飽然郡中一時仕者連廉聲獨著云

湯有容名載以字行新會人少能文敦行誼時論推之洪武丙子鄉薦教諭恭城再任興安聞兄喪即日陳情歸養久之以母命復官容縣時大疫縣令彭清疫人避去有容不可曰柰何舍我彭公力左右之得不死人比之庾袞云

梁宏字廓之南海人少穎敏被選爲弟子員貢入胄監以學行知名司業劉崧試其文稱爲奇才同館蒙由道輩莫不推重居二載乞假省親方孝孺爲南士之說贈之歸廣州後聞長安兵變遂不復仕

先用行番禺人少力學馳聲郡校洪武中貢入南雍聞譽益著永樂初授鎮江推官斷獄平允甚得民心

輿論賢之

周志新南海人 文皇帝嘗呼爲周新因改名以志新爲字洪武己卯舉于鄉初授大理寺評事每有疑獄一言而決拜監察御史彈劾敢言貴戚畏之目爲冷面寒鐵公京師中或怖小兒輒曰冷面寒鐵公來皆匿永樂元年巡按福建奏言 朝廷設立軍民諸司兩非統屬請自今府衛相見等禮途遇則分道而行即有公事不許徑下府縣毋得責辱有司官吏詔書一至雖邊衛亦從藩司遣齎都司無與焉 上悉

從之一年巡按北京時制令所屬吏民有犯流徙者免罪就發北京民稀處種田羈繫詳擬往復數月多死獄中新奏請死罪及職官有犯詳擬待報其吏民犯流徙者悉從北京刑部或巡按詳允之後就發種田則下無淹滯之患上不負寬恤之恩矣 上諭都察院曰御史言是也且命北京百姓有犯應決者許其收贖燕民大悅三年秋九月超爲雲南按察使未赴命改浙江有冤民淹繫聞之喜曰冷面寒鐵公來吾無患矣至未幾洗其冤釋之自是異政日著一日

視篆忽旋風吹異葉至前詢之獨一僧寺有此木曰此冤魂相報必寺僧殺人瘞其下也發之得一婦人屍人稱神明一巨商遠回未抵家而日暮潛以其資置一祠石下至家妻問之告以故明日求之無有往訴之新新曰是必而妻有外遇也覆之果然蓋歸語妻時樓之者竊聽先往取之矣遂併治之有訴爭蓋者甲曰吾故物也乙亦曰吾故物也新命剖之各持其半去陰遣人尾其後甲曰我始欲助汝蓋價之半得非汝利乎乙荅曰蓋本我物寧能抵價屬汝於是

甲就縛正其罪境中有虎害爲文告城隍瀕吏得虎格殺之一日行道上蠅蚋迎馬而聚尾見一暴屍惟小木布印乃令人市布得印誌同者鞠之乃劫布商賊也究正其罪以其賊召布商家給之家人大驚始知其死於賊也它如辨豆獲盜人皆驚服其燭奸類此新未顯時其妻治褥以給及同官內燕荆釵布裙以往大類田野婦各相慚恧更爲澹素其廉介類此故當是時周憲使之名震天下澤及無告民自不寬雖三尺童子皆頌其美焉初錦衣衛指揮紀綱使千

戶往浙詞事多作威福受吏賕新時進湏知如京師
遇諸涿州捕繫之千戶脫走訴于綱綱乃更誣奏新
上怒令馳馬逮新承綱意者榜掠無完膚既至蒲伏
陛前猶抗聲曰按察司行事與在內都察院同 陛
下所詔也臣奉 詔擒奸惡柰何罪臣臣死且不憾
上愈怒命戮之臨刑大呼曰生爲直臣死當作直鬼
他日顧問侍臣曰周新何許人對曰廣東 上嘆曰
廣東有此好人耶朕枉殺之矣後紀綱以罪誅事益
白新既不祿其妻獨挈遺衣及書數卷歸廣貧居如
洗都御史楊信民巡撫時存問其家周以月俸嘗語
人曰周志新當代第一人吾嘗思所未及也

陳璉字廷器東莞人性孝友敏而好學領洪武庚午
鄉薦爲桂林教授嚴條約以身先之秩滿遷國子助
教永樂初近臣薦璉有治才不宜置散地召試高等
擢知許州以寬厚寧民郡多淫祠璉毀之俗遂變未
幾改滁州均徭役時征歛禁奸戢暴民用大和值
文皇幸北都所過先遣廷臣察吏治卓異者加權焉
璉以績最聞滁人恐失之詣闕乞留遂擢揚州知府

攝滁州事賜綺衣寶鈔宴餞給驛還滁居九年擢四
川按察使憲度最明黠胥斂跡軍中暴橫有號虎彪
太歲者人莫敢犯犯輒受奇禍廉得其實捕寘重典
建言脩武備慎刑罰明禮制復義倉正風俗等九事
上嘉納之宣德丙午吏部言璉德望凝重宜師表國
學召還改南京通政使攝國子監事師道尊嚴善於
訓迪士類悅之丁內艱正統初起南京禮部侍郎卽五
年致仕璉德行淳懿文詞典重人愛之若拱壁所進
有巡狩頌平胡頌饒歌鼓吹縉紳析文者相踵於門
應之如響著作甚富有琴軒集歸田稿行于世黃蕭
養亂璉設制禦策竟平之卒年八十五賜塋祭方其
去滁時滁人侑之醉翁亭與歐陽脩王禹偁爲三賢
祠本縣知縣吳中祠璉及李用李春叟亦曰三賢祠
璉嘗構萬卷堂積書其中至今尚存

李晟字孟昭南海人器宇凝重蚤有文名少孤能承
顏事母革除己卯舉于鄉永樂初爲戶科給事中嘗
侍左右言事稱旨 上嘗有所遣陞辭許過家省母
賜道里費人皆榮之己丑春正月 上御奉天門晟

方奏事 上謂吏部曰吏材中多有能者令給事中保舉若非其人則平日交結可知晟受命奏保郎中萬子雅辦事官前御史傅衡命試二人以事然後任職由是益爲 上所知壬辰進都給事出知南寧府不鄙夷其民專尚德教歷六載梗化者悉歸供賦稅以績最擢河南左叅政所至有聲致仕家居尤篤孝友鄉邦論純君子必曰李大叅云

黃裳字迪吉番禺人少從李韓游明經學善文詞洪武癸酉鄉貢進士卒業太學授政和知縣值歲荒勸富民發粟賑饑置簿爲印識之與富民約至秋成石息二斗且禁粟毋得出境獲全者衆民甚德之政爲一省最惟毋憂去服闋部使者以文學政事薦陞禮部主事歷刑部郎中卒裳有學識多所著述在政和時嘗脩縣志其論社所以主石之義曰社祭土主陰氣也夫陽氣積而成天故其精爲星陰氣積而成地故其精爲石石擊則星出陰動生陽也星隕則化石陽變爲陰也土爲陰氣之積而石乃其精故社以石爲主也時稱其善論他詩文亦多可採者時承南園

詩社之後廣人多工詩裳與周溥敬魯惟忠潘翥胡
悌梁咨徐俊黎本寧楊肇初皆有名于時東莞亦有
鳳岡詩社則陳靖言何潛淵羅泰爲之宗皆志欲追
唐而力不逮及江門詩法旣傳始翕然從之

羅亨信字用賓東莞人自幼穎悟好學永樂癸未鄉
薦甲申進士授工科給事中視浙水災奏蠲嘉興海
鹽崇德稅糧五十餘萬石調吏科尋轉右給事中適
註誤連坐謫交趾胥吏九載洪熙改元用洗馬張瑛
薦起監察御史往通州察倉庫誅民之無賴者數人

道路肅然巡按真定等府清軍山西所至有聲時有
言亨信堪任方面者詔加按察司僉事俸宣德乙卯
超擢僉都御史備邊平涼璽書慰諭賜幣正統丙辰
與都督趙安巡邊遇虜安與都督蔣費用都指揮安
敬議逗遛不行亨信至其營斥之曰汝輩受國厚恩
臨敵退縮安用握重兵爲且汝特畏死耳死三尺法
孰若死敵貴等色變以糧芻不繼爲解即上章劾貴
等老師玩寇敬懦不忠侵尅軍餉 上命兵部尚書
王驥往詢皆如言置貴于法斬敬以徇自是將士股

慄用命出輒獲虜迤西以寘奏捷晉秩賚金幣改巡撫大同宣府總督屯糧贍軍餉興利除害爲乂安計每歲秋回京議事條奏汰冗官省虛費積邊儲禁私役請脩各衛土城以絕虜覬伺又言虜酋也先專俟釁圖入寇宜預於直北要害增置城衛備之不然恐貽大患議寢不行後有土木之難人以為知微云時叅將石亨欲以大同四州七縣之民三丁取一爲兵復令軍餘盡撥屯種量畝起科亨信奏言北虜方驕邊民疲甚加以邊地瘠薄倘如亨言是絕其衣食而逼其逃竄也且當今事勢正宣布恩信以結人心奈何反絕其衣食乎從之戊辰冬進副都御史會也先入寇所至州縣文武官皆遁英廟北狩人心洶洶亨信在宣府孤城危甚當國者議趣宣府總戎官率兵入衛京師或欲遂棄其城衆紛然爭就道亨信仗劍當門下令曰敢有出城者斬衆遂定城中老稚歡呼曰吾屬生矣因設策捍禦虜不敢南人多其功年踰七十乞致仕不許會報宦官喜寧偕虜詣城下議和密遣驍將楊俊伏兵執寧虜失嚮道乃怏怏引去

上嘉其功下詔褒之復賜金幣是歲回京陛見辭益力因免冠叩首上見其顛髮皆盡乃許致仕八年卒年八十一賜塋祭世謂亨信有安社稷功而歿典循常例有遺憾焉

翟溥福字本德東莞人永樂元年鄉試明年登進士第知青陽縣境近九華多虎患爲文檄告山神三日即殲之邑人立碑頌德移知新淦推誠布公教民禮讓累擢刑部郎中出知南康府至則訪民疾苦省刑罰禁橫征先是郡值歲歉民有擅取富室穀粟及收

漂流官木者百餘人前守論寘重典溥福廉得其情杖而遣之封壤瀕湖舟楫苦風濤無泊所遂捐俸築石隄百餘丈舟人稱便立廟祀之政暇遊廬山見白鹿洞書院遺址喟然興嘆倡義鼎建延何博士爲師簡子弟俊異者受業其中朔望親臨爲講解考績赴部以老疾辭侍郎趙新嘗巡撫江西知其賢留之竟不可挽解郡之日父老以其清貧爭持白金餞送溥福力辭皆挽舟涕泣不忍去因留帶立廟祀焉復配享于白鹿書院之三賢祠三賢者唐李渤宋濂溪晦

庵也投老却掃足跡不到公府田宅絕無所增平生
廉謹剛介始終一節年七十一卒祀于崇賢祠子慎
謙慎景泰庚午鄉薦仕至建寧府教授謙舉明經仕
至來賓學教諭皆有時名

溫琇新會人與鄧林爲同門友永樂初以國子生知
永春縣勸農興學均役平賦嘗戒歲造皮張常貢士
民德之徙治劇建陽同時有李讓者知縉雲縣亦撫
字有方多善政並見稱于時

廖五經永樂間解縉出爲交趾叅議過謹與語重之
題其西樵書舍曰及身循理懲忿窒欲敬之敬之如
余如王稷契臯陶何書可讀蓋深期之也後舉明經
爲通山教諭愿朴不能事上官或以古必目之古必
謂泥古不通變也謹作古必解折焉久之遷南安教
授致仕其教人以禮爲先群從兄弟嘗受學者終身
莫敢鴈行族子恂登進士歷官通顯事謹猶自爲役
人以是高之

劉士傳字習之南海人明經績文不求聞達永樂元

年有司聞其名以學行舉之不得已而出授兵科給事中屢言邊事 文皇嘉之授陝西布政司左叅議 巡行固原建議備狄或以爲迂轉授福建邵武知府 公勤廉慎興學勸士多所造就郡人德之

蕭嘉祐新會人將赴舉禮部黎貞作構室說贈之嘉祐再拜受教自是力學養銳堅忍其志以縱橫自用爲終身戒後嘉祐任廣西恭城縣知縣涖事公平待人以信大得民心雖山谷猺獞以片紙召之無敢後期者政暇與諸生講學士風大振後卒于官民作祠祀之世稱貞爲知人而賢嘉祐之能聽受也

張舉字元直番禺人力學窮經少有文名革除己卯領解首署全州學正立教嚴肅士知敬業永樂三年以學行徵爲戶科給事中選備講讀乞歸卒貧無以爲歛有司及親友賻之乃克葬云

陳諤字克忠番禺人永樂戊子舉于鄉卒業太學越二年拜刑科給事中彈劾不避權要嘗奏事聲震朝 宁聽者悚然 上令餓數日奏對如前 上曰是天 生也每見呼爲大聲秀才云以直諫觸禁 上赫怒

命爲坎瘞之露其首七日不死。還故官遷吏科都給事中亡何言事忤旨落職罰金。房同事者先畢工謫去諤貧不能倩人乃躬爲之值駕至問治屋者爲誰諤趨前對。上憫諤顛直且貧詔復故官辛卯九月奉使雲南還命署通政司事逾年署應天府尋改刑部所至張弛悉中肯綮丙申轉署鴻臚寺明年改工部聲績視前有加署事四年擢順天府尹政尚嚴明有漢張趙風嘗出行轉城隅誤犯。皇太子騶從事聞竟不問己亥四月有白鳥乳于庭樹諤以

獻。上賜金帛廷臣稱賀無何出爲湖廣按察使歷官三載無冤獄比代吏部侍郎師達有事湖廣留贖戎務尋改山西以事忤趙王貶知海鹽縣洪熙元年正月封建諸藩選佐輔廷臣咸推諤。上偶問左右曰大聲官人何在宜爲輔導令人易聞過遂起爲荆府長史王大書忠良鯁直四字奏之宣德戊申以母憂歸郡人素服其公冤抑者多訟之諤語諸當塗悉伸之服闋復爲長史與王不協徙鎮江府同知時戶部尚書周忱督漕于淮檄之脩陂堤卓有成績以老

乞歸卒年六十有八謬爲人剛介而性恢謫當被瘞時嘆息謂其人曰吾今夕乃爲大甕所苦請其故則詈曰叱嗟汝不知耶朝廷瘞人當以甕令速死耳瘞者如其言遂得屈伸不死云

金誠字誠之番禺人尺籍繫廣州右衛讀書社學揮使麻張最無賴遇諸塗繫之詎曰軍餘乃敢效儒生耶褫其衣使雜草烈日中稍緩則撻之誠泣曰讀書冀顯揚今且虧體辱親矣張怒逮其父窘辱之父子相視不敢言予張數金乃免永樂丁酉誠領解首明

年登進上授工部主事尋轉刑部會張奪人貨逮至京師命誠鞫問張望見誠一步九頓首誠咲迎之言于堂官釋其罪張造誠誠執禮如平時張感泣歸以女妻誠子云誠性易直不事表暴嘗侍 文皇帝北巡同行者視其舉動朝夕未嘗失尺寸蓋敦朴人也正統初以疾乞歸杜跡公門怡情山水有詩集行于時

龔遂字文昌番禺人永樂辛丑登進士第選授浙江道監察御史以註誤降山東布政司副理周九載考

最陞廣西按察司經歷性廉靜不求榮進景泰癸酉
始擢柳州知府柳爲廣右要害悉心籌略民夷安之
將及九載當赴奏績巡撫兩廣僉都御史葉盛廉其
介潔官吏畏服習知民情勤勞年久奏請加遂職俸
仍管府事吏部以聞欵埃至部考覈而後擢之遂不
待致仕歸道經賊追劫之獲所携數十簾啓視之皆
書籍云

余慶字原善新會人永樂中以國子生知南安縣革
奸弊均徭役脩縣治興學校奏免廢田虛賦一千二
百餘石流亡復業秩滿去民遮道泣番如失父母同
時番禺周思敬知南城縣亦明於吏事剖決詳允不
爲深文邑稱德焉

顏宗字學淵南海人永樂癸卯舉于鄉授福建邵武
知縣爲政平易愷悌以救荒憫旱爲先增置義倉士
民各出積粟二十餘萬石儲之歲遭歉計口給賑民
無阻饑遇大旱齋沐徒行百里禱于神雨大注歲遂
稔民有吳姓者墜死其子名鐵牛尚幼託所交育之
一日鐵牛爲人所殺聞于官邑貳執所育者抵罪其

人稱寃宗疑之積誠告城隍夢有人訴曰殺牛者驢也明日召耆老問其親有丘驢者執之一訊具服人稱爲神明聞鄧茂七作亂上命率師討之渠魁既得餘黨據險當道委宗招撫宗耆老數輩直詣賊所賊衆皆泣謝聽命散爲良民所活十萬餘人景泰辛未九年滿考擢兵部車駕司主事轉署員外卽奔母喪歸卒于途宗善畫山水爲世所重一時名畫若林良猶遜之

鄧周字文和連州人以監生歷彭澤令邑多虎室周謂厥咎在令虔禱城隍虎尋引去邑患火周曰此茅茹爲累也遂教民治陶易之數年間比屋皆瓦火患遂息

胡濟字孟時南海人學行素著洪熙元年有司以賢良舉授廣西布政司檢校正統三年廣西按察司僉事王凱以濟廉介學優薦知理定縣招徠流民復調平南邑瀕大藤峽民雜猺獞不時侵掠移窟者多濟築城衛之民始奠居正統九年廣西總兵韓觀征剿大藤峽賊連平南之大同明化二里民多就俘者濟

力爲民辨蒙活二千餘人民懷其德稱其循良廉介
至今不忘以疾卒于官

王子倫名綱以字行南海人宣德初監察御史何善
薦授長沙之攸縣丞政惠及民民愛之時草寇蕭彥
貞剽掠子倫與百戶張本捕之抵衡山遇寇與戰失
利中有引矢向子倫者衆呼曰毋傷仁賢父母遂得
免既而通政陳璉復以才節薦知江陰縣廉名益著
僅初考都御史陳智聞其有學識且操守廉介復疏
奏舉之居六年內召邑民千餘人遮道留之不得解

烏懸譙門以示不忘至京授河南道監察御史直聲
大著歷官始終不携妻子正統間巡按雲南卒二子
載貫載能文章隱居不仕貫有詩名由鄉貢任南平
知縣卒其子觀光亦舉于鄉能詩而子倫所著有彞
齊集

謝宗齊清遠人宣德癸丑貢入太學授杭州衛經歷
在任優恤軍餘差遣有節衛官不得私役上官重之
薦擢趙州同知涖事公平士民悅服歷任五載餘謝
病歸仁愛閭里尤注意于鰥寡孤獨天順中流賊陷

城邑民張俊家無噍類宗齊養之十載及沒殯葬之
人多其義

鄭敬字德聚東莞人少秀異明敏夜誦非三鼓不休
舉正統壬戌進士授南京湖廣道監察御史廉介自
持曹無滯牒六載出爲江西按察僉事改河南雲南
清慎不渝秩滿將之京土酋賙以蕪金或勸之受叱
曰我司風紀二十年享有常祿猶恐弗稱敢改節乎
竟却之成化丙戌轉山東副使食少事煩方踰四秦
而髮盡白自陳致仕歸卒于家年五十八幾無以爲

殯人皆稱之

盧祥字仲和東莞人幼多技能兄寬爲全州訓導祥
從之遊年三十始習舉子業正統戊午遂領廣西鄉
薦壬戌登進士授南京禮科給事中多所論建六年
丁外艱服闋補吏科論比虜也先僭號之故劾大臣
王文項文權等劾之未幾以言事謫蒲州判官
天順改元權等科部給事中章疏劄切多見聽納戊
寅擢南京太僕寺少卿尋以內艱歸甲申起補順天
府丞尋轉僉都御史巡撫延綏三川嚴武備肅綱紀

正賞罰屢以捷聞下詔勞慰賜之金綺成化丁亥冬謝歸明年五月卒遣官諭祭祥博學有才識以氣節自高寡諾于世獨與林聰最厚有所獻納必協力成之歷仕所至有水蘂聲其學精春秋所成就甚衆子士廉從子皞偽調俊皆預賓興所著有行素集

彭誼字景宜東莞人宣德乙卯舉于鄉授工部司務正統己巳邊事起命大臣舉風憲選老成持重者部以誼應擢湖廣道御史時王文學院號嚴明御史啓事不合輒嘆目不答獨禮重誼景泰庚午南畿諸郡

饑誼往賑日馳數百里全活甚衆壬申河決張秋隄水東趨失道受命脩理先是尚書石璞都御史王暹洪英各言方略試輒收誼乃督役夫濬之水勢稍緩隨即塞之水復故道滿輓遂通以功加俸甲戌從都御史王文平蘇郡寇有功擢大理寺丞乙亥進僉都御史提督紫荆關脩築城堡按古法造神臂弓守之尋復提督各關倉糧保定等衛屯糧天順丁丑以忤權貴左遷紹興知府值民饑即發倉卹之或謂當上聞誼曰待請而發則轉溝壑者多矣吾何愛一身而不

以活萬命乎明年有秋民爭輸不踰月倉復盈先是郡縣官田稅重耕者流移賦多逋負誼請計畝起耗減重增輕民便之又築白馬閘鹵壓不入溉良田數百頃郡蒙其利九載遷山東左布政使尋擢工部侍郎未幾改副都御史巡撫遼東前任者與鎮守總兵相左不以邊儲爲重倉無再歲之支虜覘知之聲言入寇誼至獲諜者詢焉盛稱林駱騎阻糧少士饑以故無恐命斬以徇衆哀拯乃免於是反諜語之曰汝虜恃駱汝不見中國剝木噐乎遣萬卒持之不崇朝

可盡也且芻糧山積在吾度內汝虜何恃耶諜報虜未以爲然秋發餉實鐵嶺三萬諸衛相繼於道虜始懼既乃大閱命將調發建大將軍旗鼓出廣寧度遼陽部次嚴整旌甲蔽野命都指揮崔勝進兵擊破之奪馬疋噐械輜重虜奔潰自是遠遁成化辛卯三月捷聞下詔褒諭癸巳統師征小黑山虜斬獲六十二級燒燬連州麥州等巢穴搜獲馬疋牛羊無筭全軍還復獎賚之時總督內官橫征諸屬衛誼乃令所屬移文不經院議者皆令覆請違者以軍法從事虐焰

頓息邊人德之在遼十有一年成化戊戌始得謝事
歸兩奉恩詔進階至資善大夫優游二十餘載年八
十有八終詔賜祭塋子恪以蔭補太安州判官孫綱
正德甲戌進士官至郎中

鍾順字必華順德人鄉貢進士景泰中知沔陽州江
西凶人周禮洪能起大獄爲患荆沔順召至杖殺之
監利縣民越境而訴者百有七十人受理聽斷咸得
其情監利民大悅爲立生祠於滄浪之上昭其清也
後終廣西太平知府政暇能爲聲詩人多傳誦

易善南海人以鄉薦歷官給事中出知岳州府政尚
寬厚決訟明察凡案牘一目洞然吏不敢欺稱爲神
明歷湖廣布政使景泰中引年卒于家

程勉南海人以鄉薦仕江西理問廉介勤慎決獄無
私擢監察御史按江西以廉能著聲久之丁內艱哀
毀而卒同邑湯性方與勉同舉歷仕陝西按察副使
以剛毅果敢知名

陳政字宣之番禺人生而秀穎六月能言十五作自
訟文提學僉事彭瓛見之曰此殆潛心孔孟者亟稱

之正統辛酉發解卒業大學祭酒李時勉命與商輅等四十八人讀書尊經閣登景泰甲戌進士選爲翰林庶吉士預脩寰宇志書成拜湖廣道監察御史疏敬天勤民十事人服其敢言尋奉命提督直隸學校條教十五以稽勤惰隨其資質成就之大都首德行次文藝未嘗輕易棄人故學者咸懷其德九載諸生奏保留特陞山東按察副使提督學校如故蓋前此未有也先是積歲餉缺以諸生廩折半支鈔政奏言京師首善之地宜優禮賢才不宜畱小費詔如舊典士

益感激久之太常卿缺以吏部侍郎尹旻召飲指犀帶示意政對曰腰金恒愧敢溢涯分乎遂不果用成化丁亥上疏謂追崇孔子當易大成之號以洗胡元妄擬之非復玄聖之稱以正宋人避諱之失用示一代崇道盛典會議者加詆疏寢不行是歲改雲南按察副使至則繩武弁之無良者數人脩舉憲度張弛得宜民夷安之甲午獻績如京至湖湘邁疾歸番禺治療二載卒年五十有九政爲人淳雅忠厚不言人過孝友信義洽于鄉邦其博洽多聞蓋餘事也評者謂

古稱可托妻子者政無愧云從子道最知名

袁衷字秉中東莞人正統辛酉鄉貢初授戶部河南司主事歷梧州知府改平樂永州所至公正廉明民蒙其惠尤長於詩文所著有竹庭稿

蔣濬字希舜新會人正統甲子鄉薦積學能文尤工於詩同年學士丘濬亟稱之成化初知晉江縣明敏勤慎務在利民獄非重犯悉遣之視地宜給民以鄉穀種教之播耕民蒙其惠名蔣家稻常祿外一介無所取秩滿遷漳州府同知去任日泉民刻石於城南

橋上曰愛民父母蔣公云泄漳政如在泉時致仕後民嘗見思濬爲人慈祥愷悌所至民皆戴之

方俊字彥卿東莞人涉獵群書最喜程朱語錄與名士新會蔣濬友善日夕倡和濬自以爲不及景泰癸酉舉于鄉授浙江義烏令改廣西藤縣所至廉能有政聲俸入惟構書籍不事產業曰吾畱心田遺子孫足矣性峭直好面刺人過縉紳皆憚之尤善雌黃人物少許可獨重同年張泰後泰歷尚書爲名臣人多其藻鑑

李嗣字克承南海人性端謹質幹魁梧年十三爲邑諸生性度敏達識者知其偉器景泰甲戌進士授南京戶部主事嘗催督南畿江西積欠輸賦不勞而集奏增大臣一人專董其事遂爲例晉署卽中事時五城兵馬司妄奏房鈔都稅司侵尅參提兩正其罪尚書張鳳推重之曰公輔才也欲薦自代會鳳卒出知金華府下車之始適行鄉飲酒禮有司設主席殺核視賓十倍遽命撤之由是吏民知風指終嗣任不敢干以私奏立正學書院祀先儒王何金許四賢重脩

呂東萊張南軒朱考亭麗澤書院俾郡人知所嚮慕奏設湯溪縣隸本府治行冠江浙諸郡壬辰大計考績高等遷浙江叅政脩築長堤以禦紹興寧波海漲二郡民永賴其利又上軍政數十事皆行之晉福建右布政使漳州有狂生善幻術醉後能人役草木呂吏上變藩臬議舉兵嗣曰討之是激其反爾單車徃其家命縛以歸一省帖然尋轉左布政使辛丑入覲道經金華民爭迓之攀轅涕泣不忍舍刻石路左以昭功德癸卯遭內艱適蘇松多事奪情起爲都察

院左副都御史巡撫其地首陳事宜降勅嘉獎所至百廢具興尋召還授戶部右侍郎會本部有言兩淮鹽法不舉虧損邊儲事者奉璽書督視兼都察院左僉都御史以行悉心群務偶感疾即疏乞歸詔許之令疾瘳起用遂乘傳還第弘治甲寅卒年六十有九居官二十餘年篋中惟白金十兩田園無所增時稱其清介云

何楚英字邦佐南海人正統丁卯舉于鄉釋褐陝西道監察御史天順初天變詔求直言上疏條陳四

事一課農桑二禁游惰三正倫理四明禮制上嘉

納之又嘗劾逆臣吉祥擅作威福會大祀督光祿寺厨人竊蜜事發正之以罪吉祥緣此中傷之下錦衣獄械示三月左遷貴縣主簿成化間巡撫都御史韓雍用楚英剿賊獲文清等以功超爲潯州同知仍知貴縣事又以運糧草積有年勞擢柳州知府城舊土壘至即易以巨石時倚以爲安丁內艱起復補太平郡學又廢捐俸新之以弭盜安民考上上晉廣西布政司叅政越二年去官抵家杜門不謁公府惟與朋

故相娛卒年八十有二

魯能字千之千戶所人其先自寧國來家新會登景泰甲戌進士官戶部郎中出爲陝西叅議轉叅政晋布政關陝重地聚戎馬十數萬控制荒逖糧餉百需皆取給藩司能有心計所歷山川阨塞屯堡要害儲蓄多寡兵馬強弱無不周知既總司創會計堂出納損益咸得其當自是備邊休民皆能之力也歲所給糴銀數十萬舊乾沒於權要悉革之晋都察院右副都御史巡撫甘肅制置事宜凡十曰新號令謹練習

脩城堡明賞罰覈功實抑虛詐恤孤寡稽儲積行賑貸撫番落令下軍民安之惠三月而家計至哀毀踰禮比代還疾已篤歸至會城卒年五十八囊中惟白金三十餘兩士論哀之

吳讓字克讓南海人景泰中進士筮仕知臨桂縣以清慎知名巡撫都御史葉盛獎異之曰使有司皆公廉如讓民生何至失所天順己卯超擢慶遠知府蓋異數也慶遠處在極邊所轄東蘭南丹那地三州皆土官各餽白金三百兩爲贄讓悉却之由是土官知

有法紀地方以安居一年卒年四十有八人皆惜未究于用

朱琳清遠人景泰年間任龍溪知縣居鄉時有黃清幼年父母淪沒琳見憐助其喪葬婚儀又曾出稻賑貧鄉民德之入祀鄉賢

陳騏字夢祥南海人少爲醫生有司使視重囚入獄中穢不能忍耻之乃學舉子業領天順丙子鄉薦連登進士拜大理寺評事晉左寺副出爲江西僉事巡視嶺西脩撰羅倫爲序送之稱其剛介比至發奸擿

伏有能名民病癘瘴以藥活八百餘人覈虛賦明經界均徭役民不敢欺有病死而歸以被踢殺告者騏視而折之曰傷必有血蔭今肋骨形彎外黑內彼豈能自內踢耶煮皂角水洗之黑色盡去獄遂決人服其明巡九江以南凡清出虛賦十八萬三千餘石儲贖罪穀備賑濟至二十一萬六千石有奇以各道罰罪銀市材倩工脩理學校祭器及正聖賢像服之不
如制者所毀淫祠九十有七區百姓以陳打鬼呼之
遷雲南副使時鎮守太監錢能家人不法每爲騏所

制遂中傷之落職卒年八十餘騏性勁厲自許晚年
論名理與張詡不協著鳶魚辨原學諸篇亦其自得
之見云

蕭垣字孟韶南海人景泰庚午鄉薦筮仕四川合州
知州築長堤以捍江水灌溉平疇民獲其利廉能大
著擢應天府治中

梁昉字景熙順德人景泰丙子鄉試第一登進士南
弱冠授蕭山知縣禮賢興學治甚有聲三載擢御史
遷浙江按察僉事喜擊斷不避權勢又能發擿姦伏

曲見情詐豪猾遠徙尋卒于官昉生平廉介不餘一
錢人帛同邑有周世雍者亦進士歷江西憲副其清
埒昉精律令剖決如流然持法過嚴頗傷平恕云

鄭瑾番禺人景泰丙子舉于鄉授豐城知縣以憂去
改令晉江邑多豪強俗復悍訟前令罕滿秩者瑾平
易庶恕推誠待物民風丕變弘治三年賊溫文進來
寇府寮閉門震恐瑾帥師討平之邑有陸斗門障捍
大江旋興旋毀瑾繕治有方民蒙其利勒石紀功九
載秩滿邑民數千人詣朝再留三年擢杭州府通判

晉江人至今思之

黃瑜香山人幼聰穎明尚書景泰丙子舉于鄉入成均以經行爲一時冠天順初天變詔求直言疏上六事一曰正身則天下治二曰正家則天下定三曰正禮則天下化四曰正樂則天下和五曰正稅賦則天下富六曰正軍伍則天下安凡數千言觸權貴將得罪賴廷臣揀之而免成化己丑授長樂知縣首捐俸遷建學校日與諸生講論有兄弟相訟者開導之皆涕泣相讓而退以勁直忤當道浩然求去民攀留不可則爲立生祠既歸徙居會城番山下卒年七十有三所著有雙槐集及歲抄傳于世孫佐最知名

何清字仁甫連州人讀書強記五經悉通所爲絕句詩可追唐人景泰丙子舉于鄉累授都督府經歷擢懷慶府知府忤上官調知太平所至皆有惠政獨不能與時俯仰故人多嫉之未老乞休葛巾野服遊適田圃間客至卽歡宴竟日非公事不至州治聞談時政者拂衣掩耳而去

何淡字中美順德人天順間以進士知濱州濱古渤

海難治且多無名之徵淡以勸相耕農爲首務其病民者一切罷之絹布粟麥皆得折充賦稅民深以爲便也故其課視他州反最暇取教民榜雜以弓氏鄉約爲條教使行誼老人訓其閭里月朔以善惡聞有不善則自謂不能宣明教化欲自劾退於是各悔謝相責讓訟爲之簡所得輿皂折薪錢悉移以應公務新學宮脩禮器延師儒聚民之秀者教之初士習鄙悍自是彬彬甲他州矣都御史賈疋疏淡異等堪備京堂之闕會以憂去士庶萬餘遮哭憐其貧醵錢二十萬使鄉老余良勝贖於臨清淡峻却之良勝負還不匿一錢蓋化於淡也乃貌涉龔遂祠至今祀焉服闋入爲虞衡負外遷漢陽知府府多魚小民爭利親藩園奪其中上書罷之教民力農築陂堰使時灌溉郡人頌其德尋擢貴州叅政時生熟苗相攻郡邑騷然臺議兵淡獨持撫命下卒如淡於是檄淡往淡單騎入諭以威德遂定未幾乞歸養年僅五十餘從弟副都御史經亦同時致仕淡居官三十年一介不取知縣吳廷舉以爲吳隱之流亞分俸調之卒年七十

五

吳澹字源深增城人自幼嚴謹嘗讀書一室有女僕
戲於傍澹怒白其母出之乃已天順庚辰登進士第
初令弋陽慕古循良風日與諸生講學習射助其不
給復立義倉儲粟萬廩民之無告者時中貴人行縣
暴斂無經莫之敢撓澹每抑之曰寧令受譴毋虐吾
民居六載民間利病興革殆盡政平訟理澹薄自甘
歲旱祈禱徒跣行烈日中甘雨時注遐邇大悅性端
謹視篆斷獄未嘗左右顧或問弋陽髻何似澹不識
也直指陳選薦其賢遂擢饒州府同知清操愈勵鄉
大夫高明率六邑之民留爲郡守命未下而卒惟一
老僕在傍饒守發篋視之不足於殮士民並建祠祀
之

張瓚字德潤番禺人威儀岳立見者起敬登天順丁
丑進士歷官戶部主事駕部員外郎初知撫州撫爲
江右大郡號稱難治瓚清詞訟抑豪右制奸吏不徇
私謁徵士吳與弼訟
弟所奪當路怙其重名久
不能斷瓚一言定之有
貴寄籍者前守莫敢發一

後瓚後之如例豪右殺人繫獄請囑百端竟不可易卒正其辜郡中詭戶免徵瞞丁脫役霍善吞貧諸弊革去幾盡故隣境大旱連年饑殍盈道撫獨無害成化四年境內野蚕成繭士民以爲德化所致形於歌誦撫人謂近守土者惟閩漳王昇和易不苛祥符王宇清峻不滓瓚兼其能而文學過之成化十年改守漳州四月抵任有大鳥集于庭人以爲怪命射殮之是秋八月溪水大漲壞民田廬漂溺不可勝計瓚具船張筏拯活數百人先發廩賑而後報聞上官責其擅瓚曰待報而發民死盡矣是年奏減六縣租有差又留意學校以漳士專業易乃延莆田鄭思亨授以尚書後多成就士民立去思碑再調潯州不能徇物卽罷歸瓚詞翰如流尤工于書子詡最著

祁順字致和東莞人天順庚辰進士廷對傳當首舉以姓名近御諱傳臚弗便乃抑寘二甲第二授兵部三事巡山海關代歸轉戶部員外郎中督餉臨清成化乙未建儲賜一品服使朝鮮關人故集土兵土物萬計從而貿易悉屏斥之惟疋騎從自就館至旋旆

金縉聲伎之奉一切尾却三韓君臣相顧駭異爲築却金亭刻使東稿以味未幾出爲江西叅政三載以註誤謫知石阡府其地僻陋至則謹斥堠開屯田廣儲蓄流散日復土人素不知學乃集儒生親爲講授後擢科者數人歷江西左布政使兩院交薦王恕在吏部亦疏引之內閣丘濬劉健皆順知已欲相援順辭甚力其平生邃問學持大體人不敢干以私用公帑毫不妄費在江西積金數千將易箒聞人言可私爲歸計者即戒妻子曰若私此金吾目必不瞑矣乃

悉歸公帑卒年六十四嘗著石阡志十卷巽川集二十卷行于世弟順舉于鄉從弟珍敦雅明經子敏孜政敕皆以春秋得舉敏敕最知名敏字惟學壬戌進士授戶部廣西司主事嘗差宣慰懷來鎮給賜邊軍人受實惠

敏字惟允弱冠魁鄉薦丁丑進士對策有云雖上聖亦必有所思雖至尊亦必有所畏道以思而明心以畏而存蓋舉其所學以爲獻也歷刑部主事郎中嘗辨出曹恕王良弼之冤議減屈劍高欒之獄人以爲

平戊子廣西主考竣事拜饒州守治獄如刑曹時奸吏弄文者悉斥之常議鑿井濟囚渴忽泉自湧出人呼爲應德泉會有詔燒造郊壇磚以愆期逮獄謫婺川典史道病歸卒人咸惜之其教子弟曰士君子求不愧此心而已進退榮辱命也人以為至言有棠埜藁藏于家

馮遵字宗轍南海人天順庚辰進士筮仕吏部主事清謹有名進員外郎當銓持法不私爲當路所畏久之擢福建右叅政時官吏部者多得京堂遵補外怡然不色愠蒞任益盡心所職民皆懷其惠後致仕卒遵善鑒別識大學士梁儲布政李祥於未顯時皆其婿也子濟弘治戊午鄉薦授湖廣永州府同知以廉能稱卒于官

陳道字克脩番禺人政從子也祖天福洪武初以事戍泗州父榮徙盱眙因占籍焉道少力學兄克正爲河間教諭不遠千里往師之天順壬午舉于應天登甲申進士授吏部文選主事坐累調南京刑部歷郎中清謹自持門無私謁丁酉值內艱服闋改南京兵

部武選甫踰年擢知金華府民多健訟所牽引輒數十人累月不能決道一訊輒得其情鮮挂累者有奸豪屢起大獄捕置于法在事七年擢江西叅政歷陝西左布政使所至以能著聲尋擢右副都御史巡撫河南至鎮疏陳利害甚悉治河防寇動中機宜又以河南宗室太繁無賴者導之橫行不嚴禁之將爲國家憂非所以全親親也戊午入爲刑部右侍郎亡何轉左尋擢右都御史視篆南院踰年改南京刑部尚書道諳練而恕獄無大小悉加詳慎所讞鮮繇寃者

癸亥秩滿將赴京奏績以病乞休俟命于家尋卒年六十九贈太子少保賜祭葬爲人寡言笑慎取予淡交遊雖尚寬厚至於臨大事治大獄則持之確如也子大章登進士歷南太僕少卿孫雲松官叅政

韓殷字阜民番禺人宋魏公琦之後祖文祥宋末始徙番禺殷少舉于鄉登景泰甲戌進士歷官刑部郎中伸寃理枉不避權要號韓鐵筆都人比之二鮑嘗偕給事中白瑩往閩鞠御史朱榮獄守正不阿及卒督府韓雍勒碑表其賢所著有雪鴻藁四卷殷沒百

餘年始播傳之從子宗堯爲安仁令亦有廉聲

康麟字文瑞順德人景泰甲戌進士授御史按閩中發奸摘伏如神出爲僉事廉介無私豪強屏迹剛直見忤人皆惜之陳獻章嘗爲其賦介軒麟工於詩嘗以韻類集唐詩爲雅音會編又著世教錄行於世

陳穢字仲方番禺人登天順甲申進士授南京戶部主事侍郎王恕署部事少許可獨稱其介歷正郎出守梧州州當兩廣衝政務繁劇穢處之得宜督府朱英高其能甫擬薦之會以憂去起復例補故官適王

恕爲吏部尚書雅知之超擢福建叅政巡歷所至吏不容奸民甚德之晉廣西右布政使時兵旅煩興供餉不乏弘治辛酉與臺臣忤遽乞歸居家十餘年以詩文自娛卒年七十八穢方正執禮見客必冠帶聚會雖甚歡未嘗出一狎語無名白衣與抗禮對席輒叱退之婦女孀居者皆能守節人稱其家教云從子文輔登弘治庚戌進士歷大理寺正剛方明決以讞獄不右中官劉瑾惡之罷歸瑾誅起知台州府不赴年未五十士論高之所著有坡山集

林榮字孟仁番禺人天順甲申進士授南京河南道
監察御史以憂去起補河南道成化己丑按山東值
歲大饑設法賑濟流民復業者以千計甲午按治山
西劾襄王不法遣使往覈如榮言由是名益振庚子
擢福建按察副使巡視海道俘海寇四百餘人甲辰
解官家居十年卒

陳晟字美宣番禺人少孤貧同郡鍾定者育為子遂
冒其姓舉天順壬午解首以四年成進士改翰林院
庶吉士將授官抗疏言臣不陳則恭子定雖教育恩

踰所生然天性之親不敢違也况五喪未舉已二十
年苟受一官義當致身終無葬日不孝之罪上通于
天將焉用之請復姓歸葬詞甚哀惻 上可其奏歸
事定孝敬備至未嘗言及復姓事後定知之大詬晟
衣冠請杖定杖至流血終不敢起定亦感悟相與如
初拜戶部主事歷郎中出知雲南臨安府剖斷如流
夷棘龍警服省冗費以萬計黔國公索歲饋晟執其使
囚之懇請乃免自是無敢干以私者未幾卒于官百
姓夷酋咸悼之爭護其喪歸廣州晟為人最篤倫理

妻黃氏鍾族義女登薦時尚未配富室欲妻之不許
比黃卒作詩哀之極其悽惻聞者墮淚陳獻章甚重
其爲人

王拯字以仁東莞人天順三年舉于鄉授邵武知縣
爲人英敏強記吏民有事於縣者一見輒不忘公廉
愛民服食淡素督造版籍請托不行稽考精明宿弊
盡革每朔望詣學課試諸生賞勤懲惰率以爲常尤
慎興作縣署敝自捐俸金三百脩之尋以憂去服闋
補知昌化政如在邵武時丘濬稱其政行雖古循吏
不能過也去任六十餘年士民尤思慕之

龐璫字廷佩南海人天順己卯舉于鄉知福清縣有
智略治尚精明以邑人好訟用嚴治之犯者輒麗于
法吏胥歛戢不敢爲奸崇儒重道廣學宮置祭器即
公署吏廨無不竭力飾之時稱能吏後祀于名宦祠
孫尚龍以鄉薦歷楚府長史

陸宣字汝爲三水人天順己卯舉于鄉以乙榜授江
陰教諭考最當遷有司詣部力辭改授靈璧過莊梟
傾蓋相孚壬子校文江西得羅欽順卷置第一明年

欽順及第時服其知人所歷必先身教貧士有餽者
每却焉賦性剛介好古循禮爲時所重後祀靈壁名

宦祠

何昌字克昌順德人少力學天順己卯鄉薦知麗水
縣甫三月以憂補宣平道出麗水民爭迎焉其爲政
寬厚無擾甚得民和時邑草創百務具興昌役之以
義民亦不以爲勞邑有劇盜毒痛閩浙諸郡兵不能
制昌設方略擒之請減坑課辦額歲銀一千餘兩民
戴其惠九載致仕卒孫宏鰲並有聲

宏字道克正德丁卯舉于鄉授通州學正負氣節文
廟分獻據禮與州守夏邦謨爭論督學直宏議以憂
補忝州遷六合知縣縣當孔道民棘於供億宏均其
役稱畫一焉有貴戚與豪民訟久弗決刑部以宏往
遂決之溧陽民坐殺人拷死相繼不白御史下宏遂
白嘗具獄御史田頊三反宏三執人謂宏當獲罪頊
竟薦之曰縣令不爲御史所撓可不謂賢哉人亦以
是賢頊云尋擢南京江西道御史疏論銓曹任用非
人逮詔獄尋釋之遷德安知府致仕

鰲字子魚正德戊辰進士知慶元縣慶元在萬山中
獷悍難制豪猾持吏短長鰲至捕首惡誅之治聲籍
甚召爲御史奏驅佛朗機夷人出境嶺表始安擢守
松江遷按察副使備兵徐淮其時夫役久爲民患鰲
定以約法歲省民財數萬自沛至徐築堤亘百里河
不爲害人以是頌德焉歷湖廣布政使卒弟翼字子
時嘉靖中以禮經魁兩闈授兵部主事未幾移疾歸
當路嘗咨民瘼邑里受其賜子思贊亦登進士歷福
建運使

張善昭字彥光順德人天順壬午舉于鄉試吏部高
等授兵部司務大司馬余子俊甚才之超拜四川僉
事以忤臺臣謫鳳陽通判轉臨江魏安生等八十四
人隸入籍皆練子寧肺腑善昭上言子寧忠貫古今
太宗謂子寧在朕當用之 昭帝亦稱方孝孺等爲
忠臣旣忠之矣何肺腑外屬尚以奸惡配百年不宥
哉乞復其家旣奏朝野壯之尋致仕初善昭計偕天
順癸未南宮火友人劉琮死焉善昭旁皇數日於煨
燼中得遺骸歸瘞卒業成均同舍趙蘭生窘且疫人

莫之顧善昭頻視之蘭生垂絕叩枕謝曰螻蟻何足累君君自愛比再往已卧于地善昭撫其心尚溫也復舉於床越數日愈明年蘭生舉進士德善昭若父終其身焉善昭里居周厚本支及其鄉人居旁無甚凍餒者布政使劉大夏嘗單車遠訪善昭信宿乃去孫灤最知名

灤字景川生而秀朗弱冠以正德辛未進士知建平三年稱職待詔考功先是巡江御史賀洪有里中子客遊建平檄灤與之徭不聽而灤所禽治邑豪復交構其間於是洪論灤惰厥職改廣昌灤乃上書訟洪違憲綱聽請寄預平徭侵職掌挾懷私忿凌轢下僚洪坐削籍灤改廣昌如故尋遷主客主事督會同館是時大司馬王瓊與都御史彭澤有怨以處哈密事効澤納幣啓釁欲寘之法併逮都御史李昆副使陳九疇澤嘗討流賊有功時議多右澤第以瓊故莫敢爭灤獨抗言澤以功受誅此後誰復任事者因言於閣部大臣會瓊遣其屬儲洵持牒邀灤窮核其事曰此宋覆轍也事成有顯擢灤正色曰公誤矣大夫出

使于外苟利國家專之可也澤與土魯番檄固在豈
宋屈巳和戎比耶范仲淹嘗與元昊書寧獨澤變起
倉卒徵李陳邊人且爲魚肉奈何並罪之公所得幾
何乃助不義爲謝王公毋汙我使得罪天下後世卒
不署牒閣部大臣及言官多抹之者皆得釋澤之力
也尋改儀制儀制掌朝廷典章封冊學校貢舉及四
方章奏主事姚鏞嘗類爲書未備及澤乃卒就之進
精膳員外嘉靖甲申議稱 孝宗皇伯考澤與諸臣
哭諫 上怒悉繫詔獄於是澤以杖死年三十有八

澤未死猶力創草疏數千萬言大要主爲人後考
之子期稱上及彌留投其疏謂李義壯曰身盡廢獨
此心耿耿耳聞者傷之隆慶改元贈太常少卿澤生
平慷慨尚氣節見義言不顧其身嘗言唯吳獻臣可
語此故卒死杖下

歐陽寅字敬之從化人少敦樸力學以禮自律屏去
浮靡鄉人咸以篤行稱之領天順壬午鄉薦仕爲鬱
林州知州操持清謹甚有惠政九年考滿士民遮道
留之僉事曾麒以其政績聞詔加俸復留舊任三年

擢南寧府同知遂稱疾上疏得致仕歸後以壽終鬱林人思其德祀于名宦祠

張泰字叔亨順德人成化丙戌以進士知沙縣政尚寬平庭無留事時經兵燹荒札泰至百廢具興三載徵授御史論宮闈與政上怒杖之尋督學政以憂歸十餘年起按雲南奏開解額五名嘗薦董玘神童不稱旨後玘及第人始服其知人先是象馬思楨執木邦宣慰司罕完法囚禁四十年未有以處之泰徵兵臨其境而以檄諭思楨思楨感悔出罕完法還其

故土並械首禍者三十餘人請罪事得已人以為能既復命劾中貴人及戚里壞法者上怒甚已罰俸半年尋超為南京太僕少卿改大理薊州皇莊與牧馬草場爭地考案久不白泰得求樂中開設圖書為左權貴始服擢副都御史督儲南京疏十二事皆報可正德丁卯遷工部侍郎改南京都察院右都御史時劉瑾虐燄重灼所求不嘆竒禍立至泰入賀唯以二土葛遺瑾瑾知其清遷南京戶部尚書令致仕居家三月卒泰孝友兄順庶子毋欲薄分順泰泣諫竟

均之夫妻相敬如賓聲色不加於僮僕聞人過未嘗出諸口時稱長者官居六卿猶然先人之產子孫不免貧乏云

鄺文字載道南海人父宏善詩與陳獻章賡和淡於勢利二子通顯其貧如舊獻章以三代遺老稱之文登成化丙戌進士歷監察御史覈帑通州劾外戚掇剋謫黃巖令挫豪猾完逋負捕劇盜以最擢淮安同知丁內艱起知大名改漳州居官廉明剛果吏胥無所庸其奸民多通夷緣而劫掠文嚴禁之鮮敢犯者爲政未究而卒族第郊南京工部郎中以清操聞孫約壬戌進士歷監察御史巡按應天貴州所至有聲終河南按察副使

羅昕字公旦番禺人少習春秋廣士多非咲之昕獨力學不倦成化乙酉舉春秋魁廣士爭從學焉嘗著春秋綱領樞要後登甲辰進士弘治間累遷貴州按察僉事以剛方見稱尋陞廣西副使恩威並行邊人思之

李聰字士達順德人父德彰善醫以藥濟人未嘗責

報黃寇之亂衆推爲長據險禦賊境內獲全聰曠達
不飾廉隅成化丙戌以進士授南京江西道御史時
孝宗龍潛聰同文武大臣疏請正位東宮 上意遂
決既而立賜綵幣陞嘉興知府以憂補饒州節用簡
刑勸農興學湖水爲患築堤捍之今稱李公堤云兩
暘失節禱無不應民居被焚聰親救之湏臾反風滅
火有虎入城傷人禱于神曰知府虐民宜爲虎傷否
則神當除虎既禱虎即就擒其異如此饒府官校橫
索民財聰戒事白太守自是無橫者遷廣西叅政未
幾致仕家居三十年不輕履城郭雖耄出不坐乘暑
不張蓋水旱必禱于社或徵科急具以質言未嘗一
日釋於民也年八十四卒

余統字承之新會人成化丙戌進士授行人擢南京
監察御史疏乞均用才抑奔競糶陳糧併殘伍禁宿
弊脩國學前後疏數千言皆切時弊上論韙之其宦
京師時有奉使者托以妻子統避居僧舍俟其使還
乃偕入其操類此卒于官

江源字一原番禺人少勤苦成化乙酉領解首登已

丑進士授上饒知縣清訟獄却餽遺士民敬之遷戶部主事歷郎中以忤權貴出爲江西按察僉事綜理屯田水利燭奸刷弊不動聲色擢四川副使飭兵松藩夷酋餽獻一無所受居三載廷議超擢源遷乞休優游泉石以詩鳴郡中

陳珣順德人成化己丑以進士改庶吉士授監察御史時宦官汪直筦西廠橫恣羅織商輅項忠論罷之已而復用珣偕郭和疏諍不聽出按雲南有王射者怙直勢詐稱使者至珣械歸于京師直黨錢能鎮守

雲南大恣威焰其事珣每側行蹶踏珣氣盛弗爲禮會能掠取鎮內寶石子女及納夷賄許以土地印信諸不法珣遂効能與直朋邪相倚啓釁害民直陰持之逮珣論治謫戍居庸其子上書訟免及言官論揀放歸是時珣直聲聞天下當塗無不重珣者督府韓雍尤敬之珣菟裘在念因爲人關說多所經營以此薄於鄉評云

何澗字源清東莞人成化壬辰進士授松江府推官明允清慎門無私謁擢南京湖廣道御史轉四川按

察僉事軫念民瘼巡歷辭阻遂卒于官澹平生好學
務純實處事不苟清操尤勵非其義一介無所取與
所至以廉慎稱

黃皞字時雍南海人領成化乙酉鄉薦讀書太學明
習典故而學業益精人多從之遊試銓曹第一授吏
部司務轉驗封員外郎時東廠權燄爍人曹署謁必
跪皞以頒曆往惟長揖而已尋拜江西左叅議督理
糧儲瀕行詣太宰屠瀟曰皞叅大藩不敢不盡其力
倘有訾皞才智弗給即皆可信若謂其貪幸見察焉

皞諳練精算法吏不能售其奸寧藩欲增祿米之
皞執不可李儀賓動以危言曰王已具奏布政林泮
以下且斬皞曰第斬吾一人何與彼耶据撫其私竟
不可得居八年都御史林俊力薦之以無援不果遷
正德丁卯劉瑾用事裁督糧官皞回籍行李蕭然明
年復以舊職起之未赴擢雲南左叅政所部納樓茶
甸長官婦沙福與夫弟普顯治兵相攻積數十年死
者甚衆皞單車往諭二酋皆盛兵自備皞召而詰之
盡得其情乃執通把數輩將加撻焉操兵者望風奔

廣東通志 卷之五 五十九 日三益
潰皞度其已困釋之曰日暮且休矣遲明俱來吾有
戒約詰旦二酋蒲伏庭下聽命與之定約而歸居數
月二酋各行千金求變約皞曰吾受此緣而死者不
知其幾矣峻却之初安南長官那代攻破蒙自虜其
令祿卿族屬負固二紀皞調餼練兵若將征之者代
懼請歸祿卿妻族屬乞緩師以圖新由是威震六詔
巨璫崔安忌皞功語侵之皞盛氣相待聲色俱厲安
媿屈連呼鐵漢吏民因稱鐵漢公比致仕垂橐而歸
卒年七十三子學裘學矩鶴齡學準延年並舉于鄉
而延年領壬午解首學裘祀龍溪名宦學準最著

學準字本平叅政皞四子領正德己卯鄉薦嘉靖戊
戌授崖州學正崖地荒遠士不知學學準訓以經義
多成就者遷潛江知縣境當江漢衝夏滂歲至沒城
公署中可舟也學準躬閱車腦塚築堤捍之患遂息
士民建碑頌焉劇盜夏三力雄百夫流劫湖湘間郡
邑兵不能制學準密計擒之祀皇莊人藉三行劫學
準焉中官廖斌索不與而治兵使者亦以功非已
出忌之兩人交構遂改淮安教授久之擢南國子助

教出判潯州學準清約一介不輕取嘗署貴縣里甲
日供堂饌千錢學準曰此皆民脂也一切不受且申
革焉百姓德之既歸潛心典籍不與世事何尚書維
栢霍僉憲與瑕素重之相與結詩社于盍簪樓所著
有朱厓湖南淮南留都西潯家園諸稿詠史諸詩行
于世子潛從子淙俱舉于鄉

袁仕鳳字彥祥東莞人成化乙未進士初授江西廣
昌知縣廉介風勵擿伏如神扶弱鋤強奸黨爲之褫
魄其見義勇爲上官不能抑也民興謠誦調繁萬安

民間風畏之及視事愛民如子惟恐或傷薄於自奉
而厚以恤民遇事果斷務合人情士民帖服無異廣
昌期年行取至京當得臺省以無內援乃陟都察院
都事尋卒于官喪經萬安民爭祭賻之

陳庸字秉常南海人力行好古成化甲午舉于鄉聞
陳獻章講學江門往師事之獻章深服其德量自以
爲不及與張詡李孔脩爲莫逆交詡初見獻章庸爲
之紹介或詢詡爲人獻章曰余知庸庸知詡何問焉
庸潛心理奧多所自得其學以主靜爲本羅倫莊景

望重一時少許可遇庸輒嘆賞年踰五十親友強之
 仕釋褐荆門州同知涖任五日不能隨時俯仰輒拂
 衣歸足跡不履城郭督學憲副王弘請與相見竟謝
 不往友人謝佑卒貧無以葬罄囊助之病革沐浴更
 衣設獻章像焚香再拜而卒年八十六所著有東峰
 語錄其徒多以科第顯倫文叙最著

胡璋字資禮增城人領成化甲午鄉薦為甌寧令在
 任九年多善政民俗窳陋其親死則舉而焚諸壇再
 舉女則溺之水璋傷之令禁之不能得乃力毀其壇

密偵溺女者有犯而儻不舉則併罪之俗始為變祀
 名宦

梁儲字叔厚順德人生有異質兩輔骨隆起腦後骨
 如貫珠吐音洪亮丰儀秀偉識者知其公輔器弱冠
 舉于鄉成化戊戌禮闈第一人廷試二甲第一人選
 翰林庶吉士授編脩尋兼司經局校書侍 孝宗東
 宮講讀多所啓沃尋以纂脩實錄成進洗馬壬子主
 試順天丙辰侍 武宗東宮講讀戊午主試應天是
 歲冬冊封安南充正使悉卻饋遺不與陪臣唱和時

稱得體還進翰林學士辛酉復主試順天壬戌奉詔
教庶吉士與脩大明會典成陞少詹事兼學士擢吏
部侍郎正德初進尚書兼學士充脩 孝宗實錄副
總裁戊辰主會試逆瑾惡其不附已指摘會典紕繆
降右侍郎實錄成復尚書兼職如故瑾憾不已徙南
京吏部復矯詔將籍儲家儲在南都聞報色不少動
蓋儲素廉自知家無長物故也瑾敗召還以前職兼
文淵閣大學士入叅機務尋加少保兼太子太保武
英殿大學士時都御史彭澤討西寇有功後慶哈家
爭万本兵欲置重典儲力救止免官壬申四月流賊
悉平加少傅兼太子太傅謹身殿大學士時少師楊
廷和服闋儲力薦起既至遜居已上人以為難甲戌
再主會試是年以一品兩考滿加少師兼太子太師
華蓋殿大學士戊寅奉安 孝貞皇太后于茂陵損
益禮儀堪為後法亡何秦王請塞上沃地廣其封壤
中官張銳嬖臣朱寧江彬受賄為請 上許之兵部
及言官交章執奏不聽廷和當草制念與地恐貽患
不與 上怒不測則與大學士蔣冕皆引疾於是

上大怒促草制急儲草上曰 高皇帝今此地不以封非有愛也地廣饒產善馬士卒鵬悍易生戎心奸萌從吏不利社稷王受地毋儆德毋聚奸人毋多蓄士馬謀不軌震我邊方 上覽之大駭曰不意可虞若是其勿與已卯 上幸宣府欲自稱威武大將軍而以彬副召儲草勅手劍呢曰不草齒此於是儲免冠伏地流涕請死曰安有臣名君者臣死不敢奉詔上察其誠擲劍起彬復受宸濠賂請召其世子司香太廟大臣集閣會議儲正色曰 上春秋鼎盛何憂

及此萬一有他吾輩伏鎖矣邪謀安可聽耶衆悚然議遂寢儲善諫持正皆此類也是年以一品滿九載加特進光祿大夫左柱國庚辰宸濠反 上親征儲力請遣將不聽詔廷和右守儲冕扈從未至難平儲七請回鑾不聽留駐南都欲因舊壇大祀天地儲力言南北配位不同典章不可紊乃不果郊 上駐蹕久畿輔苦供億又聞欲幸吳楚民益洶洶儲以屢不得請乃與冕等自執章奏跪泣行宮外自未至酉得旨乃起於是駕旋裏河丁夫數十萬久俟水次饑殍

死者相藉幾至夜呼儲令有司散遣之得不及亂在途三䟽求退不允抵京亡何與楊廷和等受遺詔迎世宗入繼大統寵眷方隆忌者陰嗾其黨論之儲亦累懇乞骸上重違其志許之手詔褒諭曰張九齡忠藎崔與之風槩卿可謂兼之矣遣官護行乘傳還鄉命有司給月米輿隸以定策功廕子世錦衣衛指揮力辭乃進其子鈞甫秩儲雅有文譽六典文衡一時名士多出其門雅量休休不言人過不矜功伐論議常依忠厚色溫言遜若無所忤至臨大節則屹不可奪人或誣之未嘗䟽辨有劾其黨宸濠假護衛者第曰吾去已矣勿問久之乃知當制者楊廷和也給事中田賦御史張璉王濬李鐸群嗾誣詆言或出風聞或聽人頥指儲皆不較且薦璉用之而擢鐸爲大理丞其厚德比王旦至于持正寤主旦不及也晚年家居尤謙遜訪其業師至里門必舍輿而前士林多之卒年七十七上方有意召用計聞嗟悼輟朝諭祭九壇贈太師謚文康儲歷官四十餘年歸橐蕭然至不能治第門生相與經營始就或疑爲公孫丞相

迨歿未幾子孫不免貧乏始知其廉介家無餘貲云
有鬱洲稿行于世叙蔭八人子次揆次挹並中書舍
人次揭太學生贈州判官均甫尚寶司丞次挹以學
行稱嘗讓爵于其弟後以銓曹疏薦復官之孫宸中
書舍人敕太常少卿攷禮部主事敘禮部員外郎攷
有逸才詩近中唐畫追元宋楷書得文徵仲結法性
謙和喜賓客曾孫紹曾舉于鄉

鄧應仁字子榮南海人少耽經籍有文名成化辛卯
領首薦辛丑登進士授浦城知縣爲政愷悌不事表
暴弘治二年處州賊竊發遠近騷動應仁躬督拒戰
賊遂遁去邑賴安堵尋遷南京禮部主事歷戶部郎
中弘治末出守南安廉靜寡慾政尚平恕在任數年
惟携一家僮自隨門無私謁既去民大失望至有肖
像祀其家者

陳希文字載道南海人成化癸卯舉于鄉乙丑令武
清縣去京師百里北枕官道中通運河政弊民疲俗
又頑悍希文至視篆七日即執勳舊家販私鹽及開
市于河西務者數人治之凡利於民次第舉行期年

而邑治邑舊無城池嘗苦響馬賊每議築病工費浩繁希文移書勸戚有田在邑者計田出貲功遂告成部使者交薦之拜太僕寺丞庚午領常盈庫銀二萬兩往大同買馬給散軍士兼閱帑得欺匿銀三萬以聞歸途遇劉六劉七齊彥明之亂行次定州城中驚駭士夫耆老擁入行臺問計即登城號召發公廩以給貧民守城者有無賴子陰與賊通擒縛以徇民遂堅志固守賊環攻三日知有備乃去至真定賊已抵近郊守官關城遣人察識希文乃啓鑰希文按轡徐行驅民先入民多得按堵尋奏覈真定等府寄庫養馬餘地銀乾沒者治如律上從之丙子出爲湖廣常德知府脩理河渠興振學校居三年述職如京解官歸卒年六十有五

陳經綸字汝學新會人少穎悟弱冠領成化癸卯鄉薦第一登進士奉使廣西暇與士子講易一時宗之尋授南京戶部主事以事忤權貴謫象州同知歎曰仕宦何必要津彼猶厚我至則撫定徭民脩學勸教盡力以圖百姓撫按疏薦之尋卒于官士民哀焉所

廣東通志 卷之二十四 二十七 三百廿八
若有寒泉遺稿

梁魚順德人成化辛卯以鄉薦知平樂縣平樂邑小
役煩魚至比籍均役草田之賦蠲之尤善撫猺獞治
甚有聲遷賓州知州思恩土官岑濬爲逆奉檄往諭
濬進兼金不受後爲部使者所忌遂拂衣歸使者愧
謝留之不可賓民思之

熊季芳南海人成化甲辰進士授東流知縣秉政剛
方臨民簡易招撫流移復業者一百四十二戶出俸
贖還饑民子女者十有七人遐邇德之擢九江府同
知甫朞月丁外艱服闋以終母養卒于家年九十有
六兄孟芳天順丁丑進士戶部主事仲芳子一源禮
部郎中一漢弘治己未進士累官副都御史巡撫貴
州值支祿隴政構亂一漢討平之徵爲大理卿廕子
廷翰太學生

姚珩增城人登成化甲辰進士歷戶部郎中賦性清
介時四方運糧湊集皆以先後至期序收解官有欲
求速收者以百金干之僕以爲言珩杖而遣之自是
人無敢干以私者旣而奉命督邊餉痛革舊例餘耗

者增充餉人稱其廉卒于官旅視蕭然

吳璉字羨中南海人成化甲辰進士授含山知縣操守廉潔以德化民值年荒多方賑救前後所活盈萬政暇授生徒以周易踰年以憂去任士民如失慈母至今稱賢牧必曰吳公起復知進賢縣以守正不合引疾歸後以子貴封南京戶部署員外卽卒年八十餘子允禎允祿並歷官藩臬有聲允裕舉于鄉判寧波府父子兄弟以學業顯士林榮之

允禎字天佑璉之子登弘治壬戌進士第歷戶部卽中出知永州府愷悌寬仁蒞官清儉興學造士不科擾于民民有弗率者委曲訓諭不事刑罰有長者風歷廣西叅政祀永州名宦祠弟允祿亦以進士吏部卽中出爲湖廣叅政賑饑有方存活甚衆擢按察使御史胡守中以附夏言怙勢索賂不滿其欲爲所中傷免官

李渭字長源新會人少以事困于縣令遂發憤下帷不就席者三年領成化甲子鄉薦又十年登進士授鳳陽府推官善剖決時妖僧崔同兒蠱惑行奸大盜

廣東通志 卷之二十四 三十五
宣寧巨惡干紀金爲民患渭前後繩之法民稱快焉
仕終淮安府同知

蘇葵字伯誠順德人以成化丁未進士選庶吉士授
編脩弘治丙辰次當同考會試柄臣屬其私人遂謝
試事以此出爲江西僉事督學士子服其公明嘗脩
白鹿洞書院增置學田留心振作鎮守內臣董讓作
威福縉紳奪氣惡葵守正遂誣奏葵遣法司盛洪等
臨治之洪閉門欲刑葵諸生數百排闥入擁葵去事
竟得白改四川裝不能就其兄從建寧資之乃行後

歷福建布政卒正德辛未督學李夢陽祀葵于白鹿
洞先賢祠族孫舉人履中尤好義樂施云

葉永秀字汝實東莞人弘治庚戌進士授烏程知縣
清慎有幹力鋤豪猾邑值水患饑饉相繼永秀濬流
港力賑恤民蒙其惠六年被徵民留烏以志去思擢
御史讞滯獄雖餘喘必訊其情凡可以生之者卽爲
伸雪正德丙寅按北畿摧抑權橫論奏剴切執政惡
其直亮出知永州府丁內艱家居逆瑾誣以事逮就
廷尉得不死竟奪職歸庚午瑾誅起知衛輝未抵任

擢陝西按察副使卒于官士林惜之

余敬字行簡新會人弘治庚戌進士筮仕知淑浦縣脩學築城訟清盜息徵拜南京監察御史士民爲立去思碑嘗因天變奉詔䟽言乞黜不職全貴戚舒民困清戎伍省輸運節國用罷不急七事丁憂道遇副使歸善姚祥卒于途敬殯之歸其喪及服闋以病不行卒于家

梁景行字宗烈順德人少從陳獻章遊弘治二年鄉薦知崇明縣屬歲饑請粟賑之活者數萬人邑多盜

海上桴鼓晝鳴得新盜釋不治受記迹捕宿盜盡擒婦女惑於巫祠宿求嗣因爲奸景行收按誅之遂毀祠爲社學故事令有荻銀盡移以給諸生膏火荆南進木道出崇明司木者檄徭過多景行爭言崇明敝邑弗能任省五六萬又請減馬糧之半諸雜供盡革之改晉江未赴以憂歸服除不起先是吳廷舉知順德遇景行國士既爲卿貳則薦景行京朝官及郡太守兩䟽不報後都御史張鼎薦景行可侍從風憲而廷舉時巡撫應天以郡丞薦之乃除鎮江府同知至

則上驗聖學察黨與廣分封嚴內侍蠲逋負比什五六事于朝皆報聞相國楊廷和假子殺人論死楊一清時寓鎮江爲請一等之罪不聽遷壽府長史歸蓋廷和意也所著有壺山集十卷

黃結字資友東莞人勸之孫以鄉薦就天河教諭轉泉州教授益肆力書史兩預考官權貴以厚貲爲子關節且許薦爲御史結斥絕之其設教嚴立科條士多激發擇穎敏者授以春秋後皆得雋泉中始有春秋之學九載赴銓曹考天下教職學行第一擢遼府

右長史多所規諫王稍見踈久之知其賢始加敬焉丁內艱復除岷府而卒孫閔古登進士官福建都轉運使

鍾曉字景暘順德人少沉毅寡言舉弘治壬子授梧州訓導遷國子學正擢南御史奏革錦衣金吾龍驤騰驤四衛冗員及工部冗匠歲省漕粟數十萬劾江西叅政王奎叅議王泰白金僉事李淳黨宸濠將釀大禍及宸濠平上思曉言賜金旌之刷卷四川疏請召還迎佛使臣省費數萬并奏停採木之後蜀人

德焉未幾中忌者謫判沔陽遷知歸州先是湖廣忠路四川石柱兩土官爭地相攻四十餘年院省官不能平曉奉檄訊之片言而服民免鋒鏑曉之力也遷瑞州同知思恩知府致仕曉歷官三十年貧約如寒士生平謙和與物無競嘗治室樹楹矣隣人以爲蔽已遂裁之年八十五卒祀沔陽名宦何翊志其墓曰立朝著汲黯之節居家持郭泰之貞知縣方學龍以忠直名臣旌其門子千亦瑞州同知

千字君錫舉正德丙子判岳州工部檄解木羨金二

百餘兩歸于部部旌之遷瑞州同知 章聖太后南

祔撫臣命千祇迎事辦而民不擾郡中群盜數百由寧州歷教橋出凌江鹵掠猖獗甚千部卒直抵凌江殲其渠魁餘黨悉平俗以上元日昇佛出遊士民喧動糜財幣不可勝計千出遇之毀其像杖僧還家遂盡毀淫祠爲社學俗爲之變嘉靖九年復令市木價不足則鬻諸廢田宅充之終不箕歛於民有惡之者見謂所部不辦遂罷歸父曉尚無恙出橐裝不滿十金曉喜曰不負吾教矣家居四十年不履城郭餐粥

不繼晏如也年九十卒

王縝字文哲東莞人父恪寶慶知府縝爲人敦重寡言笑弘治癸丑進士選庶吉士授兵科給事中出使南安國王郊迎羶拜輒叱去之却所餽金得使臣體遷禮科右覈南畿屯田剗革宿弊擢工科都給事中
正德初擢山西叅政遇例裁革改雲南時逆瑾擅權牽咎罰米五百石俸不足鬻產以償瑾誅超爲右布政使俄轉福建左布政使進副都御史巡撫應天討姚峒賊王浩八有功賜鈔幣尋以乾清宮災疏答天

譴四事皆切時弊 武宗欲西巡疏止之不報壬申

丁內艱服闋以父老乞終養詔起撫治鄖陽是時

武宗欲幸諸郡供億煩費有牢虎豹以獻者縝悉令罷之且罪其首事者已卯夏寧藩煽亂荆襄震恐縝下令設守備以安人心尋擢南京刑部侍郎嘉靖改元疏陳十事正大本法祖德廣延訪重詔令禁奢侈求賢才恤民窮正風俗復舊制重人命多見採納遷南京戶部尚書疏辭不許時畿內大饑縝區處賑恤請內帑銀五萬給之尋卒于官年六十有一計聞賜

祭葬

胡澧字伯鍾三水人疆力有幹弘治癸丑進士授刑部主事遷貪外以病免正德庚午起爲工部貪外遷郎中督治濟寧河道有功遷知淑州轉四川松藩副使先是番夷作逆官軍不能克澧至製神機火箭討之箭所及越三百步人馬遇之無不焦燬遂以焚其營帳積聚一日而五寨俱平番人震懼送款督府胡世寧疏其功以忤柄臣棄官歸都御史吳廷舉疏薦不起嘗遊西樵山時霍韜以詹事山居素聞澧名倒

屣迎之因試澧箭驚以爲神與論理學益見稱賞亡何韜起爲吏部侍郎值大同兵變殺都御史張文錦韜薦澧併進澧箭詔徵赴京令兵部傳其技擬授僉都御史開府西北命未下而澧卒澧有才不究于用人咸惜之

黃衷字子和南海人父璉居喪盡禮以學行稱從遊者衆衷幼穎絕倫二歲誦孝經問孝本天性何別於天子諸侯璉大異之弱冠登進士授南京戶部主事監江北諸倉覈括積歲侵羨得粟十餘萬及督摧揚

州尋丁內艱時僅四十日輸銀九千三百餘兩前此
卽一歲之入也正德初復除戶部晉員外卽罹外艱
奔喪服闋銓衡擬改御史力辭乃補南京兵部日外
卽晉禮部卽中後轉武選尋遷吏部在留都又與應
登顧璘陳沂輩以詩文擅名後知湖州府稍遷福建
都轉運使監司胡世寧薦襄堪總糧政遂晉廣西叅
政督糧至則嚴法繩姦境內肅然時大征古田帥師
由洛容斬首一千餘級論功晉俸一階兼賜銀幣辛
巳秋八月晉雲南右布政使征芒市以功轉左巡察

疏衷忠清公亮宜加重任甲申擢右副都御史巡撫
雲南薦賢黜貪安民禦盜清里役以節財力復條陳
地方利病八事皆切機宜無何移鎮湖廣兼理戎務
首劾分巡守備者二人姦吏多望風解去復脩沔陽
州龍淵滄浪等隄士民立碑以紀功德在鎮數月積
粟八十餘萬石銀四萬餘兩言部疏聞特下詔嘉獎
賚以金帛丙戌湖廣盜起授守巡官以方略進兵討
之獲首惡六人斬首二百四十餘級生擒六百九十
餘人捷聞大被褒賚會嘗 顯陵及建仁壽宮晉工

部右侍郎兼僉都御史督理運木事竣有銀幣之賜
尋以考最方病足痿乞休不允改兵部右侍郎得抵
家䟽四上皆不許會有忌之者恣爲飛語謂裏潛至
京師乘山輜謁當路人皆知爲致仕侍郎王蓋非衷
也 上遣人馳覈驛遞關文雖偵伺無跡猶削秩焉
或勸上䟽自明裏曰事义當白何必辯也久之詔復
職致仕卒年八十所著有矩洲文集十卷詩集十卷
奏議十卷海語一卷皆行于世

倫文敘字伯疇南海人長身玉立頭顱大二尺許五
歲時與群兒戲有術者獨指之曰是兒當大魁天下
弘治己酉以儒士就試巡按御史周南得其卷於遺
材中嗟異之入試果中高等己未會試殿試皆第一
授翰林脩撰學行才器爲世所推重乙丑 武宗登
極頒朔安南克正使會丁外艱歸不果行庚午起復
命充經筵講官尋超爲右春坊右諭德兼翰林侍講
壬申九月進講舜有臣五人而天下治多規諷語癸
酉春進脩玉牒考核惟詳是秋被命主考應天試事
竣還得病卒于京師年四十有七文敘天性純厚德

器粹然望之皆知其爲君子篤于孝友室無私財雅
有弘量未常與物競尤能仗大義恤孤寡旣以文章
連掇大魁人皆期爲台輔及卒天下惜之所爲文宗
韓楊悠長宛轉類其爲人居嘗以書史自娛手不釋
卷尤善教子長以諒鄉試第一辛巳進士累官南京
通政叅議以訓會試第一廷試第二官至南京國子
監祭酒以誅登進士高等南京兵部郎中父子三元
海內科名獨擅云

方獻夫字叔賢南海人其先宗元自莆田來宦遂留
家焉祖用中博學篤行長於詩詞督府韓雍平大藤
峽賦詩頌之輒成百詠時相傳誦父遂以鄉薦署全
州學正卒遺腹生獻夫七歲卽苦學不輟莊重如成
人弘治甲子舉鄉試第二登乙丑進士選庶吉士乞
歸養母卒終喪起復禮部主事歷吏部文選員外卽
正德中復謝病歸與湛若水霍韜上築西樵往來講
學其間嘉靖癸未以薦起授考功員外卽會大禮議
興廷臣惑於濮議獻夫上疏曰今日有不可以濮議
例者宋仁宗無子我 孝宗有 武宗爲之子不同

者一宋仁宗嘗育英宗宮中立爲皇子今 皇上未嘗育于 孝宗不同者二宋濮王有衆子今 獻帝子止 皇上一人不同者三此三不同烏得牽合而強附哉少師楊廷和見而惡之衆勸其勿認前疏執不肯曰臣而欺君大罪也甲申轉侍講學士敷陳洪範之義 上嘉納之乙酉大禮書成擢少詹事丁亥轉禮部右侍郎 上以張寅獄久不白命桂萼攝刑部張璠攝都察院獻夫攝大理寺廷鞫之得薛良黃金誣罔狀而金自稱爲有司所餌使指張寅爲李五

御史馬錄遂輸服挾私故入人罪萼等以聞 上大怒欲誅馬錄及其黨株連四十人獻夫與張璠霍韜並疏救之錄得謫戍餘皆未減 上欲誅建昌侯張延齡密詢之對曰昔漢文誅薄昭致母不食今誅延齡必傷 昭聖太后心非盛德事也遂寢後夏言伺上意陰令董至等上變延齡始不免是冬遷吏部侍郎尋擢禮部尚書嘗以畿內尼姑庵寺大傷風化力請毀之 上曰霍韜嘗言僧道盛者王政之衰也所議良是遂詔毀畿內庵寺六百餘區天下僧道無度

牒者令有司嚴革之戊子明倫大典成加太子太保
尋改吏部尚書五轉皆兼學士所上應詔陳言省災
諸疏多見採納庚寅累疏謝病特許承傳歸居無何
遣行人蔡駿馳 詔徵還上疏懇辭薦尚書梁材王
廷相自代優詔褒諭仍命吏部促之監司入山勸行
比至晉少保兼武英殿大學士叅預機務賜金章曰
忠誠直諒義之一品秩滿進光祿大夫柱國甲午以
病屢乞骸骨不許懇少傅李時爲請始許暫歸調治
詣時謝曰吾得稅駕公之賜也異日 主上詢及幸

爲道廢疾不堪用狀時曰公以台鼎爲桎梏耶何避
之深也復命乘傳歸治第西樵山麓醫藥之餘讀書
談道優游十載卒 上適欲召用聞訃震悼贈特進
太保謚文襄平生厚於人倫解相後答家奴忤其兄
茂夫意輒置酒長跪謝罪尤篤交誼友人陳激裹貧
置田園以娛其老所負債悉爲償之少時與王守仁
同官吏部位居其上而折節相師士林多其謙遜年
僅五十輒辭樞筦其急流勇退尤近世所罕覩云所
著有易經約說學解大學中庸二原西樵存稿子繁

廕歷尚寶卿藻多智略精騎射歷贛州府同知所至有平寇功累擢武定知府

陳錫字祐卿南海人宋朝散大夫康延之後祖觀布衣博學工於詩學士黃諫亟稱之擬諸姚鵠岑參父子知學乎母不敬內敬恒存思無邪外邪難入寤而索諸言行錄果協於是終身誦之世傳細素至錫尤力學弘治乙丑進士授戶部主事嘗司廐逆瑾方用事群璫列中外雖東芻出納亦混主計錫以法繩之

衆不敢肆司漕運通州革弊政六條人以爲便轉員外郎調吏部稽勲司尋陞郎中一時名流多所咨決屬舍人朱麒求襲封保國公錫駁之曰洪武之約非有重大軍功不得封爵襲蔭今朱麒襲公非約也尚書楊一清從其議因著爲令正德丁丑遷福建叅政歷左布政使綏定叛軍鈞稽乾沒樹立風紀卓有令聞擢應天府尹去之日閩人爲立遺愛亭居應天未及三載廷議欲晉孤卿錫竟請致仕凡三疏得允優游田園以翰墨自娛凡十餘年卒年八十有一賜祭

廣通志 卷之二十四
三十一
三十一
葬祀于鄉賢兒子紹儒亦歷順天府尹轉尚書一門
二京兆人皆崇之

區越字文廣新會人八歲喪母哀慕切至事繼母以
孝聞陳獻章作慈母石詩貽之領弘治乙卯鄉薦乙
丑進士授浙江嘉善知縣入覲時逆瑾用事苞苴肆
行越心惡之有郁生德越餽之茗置金焉受茗覺金
竟還之尋擢戶部主事歷員外郎中委兌清江倉糧
以廉著嘗却中貴人餽晉知建寧府尋以憂去起補
直隸寧國府詳出冤獄當事難之越曰罪疑惟輕况

在不疑脫有錯誤職任其咎當事者不能奪嘗雪夜
念及穢者亟起什之曰罪止小懲凍死其若之何擢
浙江按察副使去民爲去思碑尋遷江西左叅政守
湖東平積年逋寇年七十致仕壽八十七卒

盧綸增城人弘治壬戌進士授行人奉命押蠻使蠻
獻之金辭弗受蠻益重之還除戶科給事中遷兵科
左奉命稽大同諸餉檢諸不法中官忌之出爲四川
叅政適大饑左轄欲待報乃賑綸曰汲長孺矯節急
民命也遂出官帑廣賑活者數萬進兵備副使時賊

首御馬子久爲蜀患千戶文獻集亡命有異志綸俱
勒兵誅之晉憲使適揚廷和當國子姪怙勢橫行綸
置之三尺廷和祈免竟不徇嘶之而罷隆慶二年邑
人祀綸于鄉賢祠

何瑜字汝忠順德人弘治中歲薦正德辛未承初門
明敏練達以善決獄聞即寃嫌久訟歷政不能平者
一鞫輒辨無不以爲能嘗署邑一鰥不染禱雨立應
姚源賊萬餘掠婺源漸薄初門瑜以能應檄出捕饋
饌不繼士卒饑疫瑜以俸佐之衆心感奮邀賊于鳳
亭一戰殲焉叙功行賞償以金不受丙子紅巾賊起
瑜復遮擊於栢溪俘獲甚衆當路表之令嫉其能遂
力乞休致邑人勒其功特祠祀焉

沈文淵字希哲順德人弘治乙卯舉于鄉任松溪教
諭擢知南安真心愛民甚感之居官清苦冲約如
寒士謠曰沈清清冷如水以不茹柔吐剛權豪嫉焉
遷判南昌知宸濠將反遂投檄歸及卒貧不克葬嘉
靖乙巳御史陳儲秀始爲起塚樹碑

張璧光字純卿新會人嘗從陳獻章遊領弘治甲子

廣東通志 卷之二十四 八十三 三百六
鄉薦事親孝母黃九十二歲每食必親供初任浙江
慈谿知縣俗故多淹女光立保甲嚴禁之所活甚夥
生者皆名張氏女尋改廣西懷集縣政務勤民城池
橋梁之役捐俸以時脩之民德焉居家屢請鄉賓年
八十一卒

陳吳賢字乾及番禺人舉弘治鄉薦初授臨江通判
專督糧儲時寧藩宸濠爲虐所在罔利歲發米千艘
與民貿易強索重價有司不能禁吳賢請于兩院改
諸道運次民以爲便擢漳州同知宸濠稱亂江西徵

兵協討檄其統兵赴板即禡牙就道人皆壯之嘗攝
郡事開元寺僧以歲入租私置腴田千餘石歸其券
于族人僧故其徒訟之兩造共出黃金數百賂求分
田麾之不顧沒其田以供朱文公祠祀并贍諸生之
貧者士蒙其惠覲事竣移文于漳致仕所著有在臨
在漳稿藏于家子其具舉乙酉鄉薦爲鍾祥令有政
聲所著有思誠日錄讀易疑義粵山杜稿崇儉俚言
行于世同時陳護以學行名嘗從陳新會遊事父兄
最恭謹舉酒必跪鄉邦稱之

鄧炳字子幾順德人性廉靜簡易正德戊辰進士授南京刑部主事歷郎中出知太平府擢廣西兵備副使所至有政聲適思恩賊叛炳撲討有功兩院方疏薦之炳以病乞休居家節儉寡營雖官監司猶然布素也卒年九十同邑鍾莘以鄉薦歷光澤令經學文義與炳齊名

吳宗湯字允相南海人少聰慧篤學德性溫醇正德己卯舉于鄉嘉靖乙未中乙榜選橫州學正勤課士貧者周之遷桐廬知縣自勵清操夙弊盡革泣政三載吏畏民懷及應朝士民慮其不再來解舄識去思焉中途病歸不克覲例當黜上官以其賢能保留之量移古田而宗湯飄然高蹈不復出矣家居三十餘年足不履城市惟吟詠自娛里中有楊希顏者被盜誣鍛鍊成獄後訴直指下郡覆讞郡守以宗湯長者欲得其一言而決其子奉厚貲請宗湯曰汝父本良民誰不知者安用阿堵爲竟爲白其誣而不受餽人皆義之希顏感其德宗湯沒後諱日必祭寒食酌墓終其身焉

李一寧字應冲東莞人宋儒春叟之後領正德丁卯鄉薦鷄津學諭提學御史王應鵬檄掌漳川書院清苦服勤士習化之遷蘇州府學教授居常端方嚴重而遇諸生則恂恂無疾言遽色務以身帥人不事表暴未嘗徇人以非禮之恭後知懷寧縣豈第愛民素絲益勵雖冠服敝垢弗易也卒于官幾無以為殮士民哀之先是渡江遇一覆舟心動令人鑿之得一婦抱嬰兒猶活詢知長沙人隨舅宦遊一家淹沒板挂已二日矣為買舟送還其鄉兄一清亦領鄉薦知新

繁縣有廉名

劉文瑞字廷麟新會人正德辛未進士授行人奉使

占城賜一品服選刑科給事中時上屢巡幸文瑞抗

疏極諫其畧曰臣觀聖意所欲巡幸自遼東宣府大

南北直隸必遍而後已然遼東迤西地近戎虜軍民

類多罪徙一有邊警挈家逃竄宣大二鎮數經蹂躪

民何以堪河南山陝南北直隸則又水旱相仍寇賊

竊發凍餒而死不可數計逃亡從賊者復逾半矣災

害既慘今復騷擾民將何控詩曰天命降監下民有

嚴言民心怨上天怒也且儲位未繼府庫空虛民

窮盜起災異見正當修省而猶結怨於民竊為

陛下慮之伏願即日回鑾以慰臣民之望宗社生

靈幸疏入不報尋擢湖廣僉事抵家卒文瑞為人朴

廣東通志卷之二十四
原慷慨不計羸乏卒之日歛葬不給鄉人惜之
鍾善經字理夫順德人正德辛未進士授興化推官
善折獄時有使臣入境威嚴甚設善經一見即知其
僞叱左右執之當道交薦其能召拜御史尋以親老
歸養居會城數十年未嘗請謁爲時所重痛弟蚤喪
訓其二子皆鄉薦奉母安與常數百步母再三命退
乃已卒祀仰高祠

廣東通志卷之二十四



